

馮自由著

華僑革命開
國史

居正題



上海图书馆藏书



A541 212 0017 5143B

馮自由先生著

華僑革命開國史

沈亦士題



目次

自序

一	香港之部	一
(一)	楊耀記商號	一
(二)	輔仁文社	二
(三)	興中會總部乾亨行	三
(四)	中國日報	八
(五)	大明順天國總機關和記棧	〇
(六)	世界公益報	一
(七)	廣東日報	二
(八)	九龍光漢學校	二
(九)	九龍青山農場	三
(十)	有所謂報	四
(十一)	同盟會及南方支部	五

- (十二) 東方日報……………一九
- (十三) 少年日報……………一九
- (十四) 時事畫報……………一九
- (十五) 灣仔馮宅……………二〇
- (十六) 金利源藥材行……………二一
- (十七) 支那暗殺團……………二二
- 二 檀香山之部……………二五
 - (一) 檀香山興中會……………二五
 - (二) 興中會之復興及隆記報……………三三
 - (三) 民生日報……………三四
 - (四) 自由新報……………三四
 - (五) 興中會改組同盟會……………三七
- 三 日本之部……………三九
 - (一) 橫濱興中會……………三九
 - (二) 橫濱兩俱樂部……………四一
 - (三) 橫濱文經商店……………四一

(四) 橫濱華僑學校…………… 四三

(五) 中和堂…………… 四四

(六) 開智錄月刊…………… 四五

(七) 廣東獨立協會…………… 四六

(八) 橫濱支那亡國紀念會…………… 四六

(九) 振華商店…………… 四七

四 越南暹羅之部…………… 四九

(一) 河內興中會…………… 四九

(二) 西貢堤岸同盟會…………… 五〇

(三) 河內海防同盟會…………… 五〇

(四) 暹羅華暹日報及同盟會…………… 五二

五 美國之部…………… 五四

(一) 美洲洪門致公堂…………… 五四

(二) 舊金山興中會…………… 六一

(三) 舊金山大同日報…………… 六二

(四) 美國同盟會…………… 六三

- (五) 舊金山少年中國報.....六七
- (六) 洪門籌餉局.....六八
- 六 南洋英荷二屬之部.....七二
 - (一) 南洋中和堂.....七二
 - (二) 新加坡圖南日報.....七四
 - (三) 新加坡南洋總匯報.....七八
 - (四) 新加坡同盟會.....七九
 - (五) 南洋支部.....八一
 - (六) 新加坡中興日報.....八四
 - (七) 新加坡三大書報社.....八五
 - (八) 新加坡星洲晨報.....八六
 - (九) 新加坡南僑日報.....八六
 - (十) 英屬七洲府同盟會及光華報.....八七
 - (十一) 英屬各埠書報社.....八八
 - (十二) 荷屬各埠書報社.....九一
 - (十三) 荷屬各埠同盟會.....九三

七 緬甸之部……………九六

(一) 仰光新報……………九六

(二) 仰光同盟會……………九七

(三) 仰光光華報及進化報全緬公報……………〇〇

八 加拿大之部……………〇三

(一) 雲高華華英日報……………〇三

(二) 加拿大致公堂及大漢報……………〇四

(三) 加拿大同盟會……………〇九

九 其他各部……………一三

(一) 澳門華僑之革命運動……………一三

(二) 南非洲興中會……………一七

(三) 台灣興中會……………一七

(四) 菲律賓同盟會及公理報……………一八

(五) 澳洲警東報及民國報……………一九

(六) 庇魯國利馬埠民醒報……………一九

十 華僑革命黨選與歸國參政代表之經過……………二一

自序

中華民國之肇建，以海外華僑協助之力爲最巨。自孫中山先生（以下概稱總理）甲午年（民國前十八年）首創興中會於檀香山，以迄辛亥革命成功，幾無一役不倚賴華僑之資助。近人有警語云，無華僑卽無革命，誠確論也。余幼居日本橫濱，乙未（民國前十七年）十四歲卽以父命訂盟於興中會。癸卯（民國前九年）二十二歲任香港中國日報及美洲大同日報駐東記者。乙巳（民國前七年）任香港中國日報社長兼同盟分會會長，與海外各埠革命團體及主要黨員均有密切之關係。就中經過無數捐軀報國及變產從公之種種大小事實，忠義壯烈，可歌可泣，表而出之，大足以廉頑立懦，而振作國人救國救民之勇氣。去冬嘗應中央海外部之邀，編撰華僑革命史談一書，在印度加爾各搭城付梓，專供海外各埠僑衆精神食糧之需。願是作爲該部海外叢書之一種非賣品，以抗戰期內利便郵運，限於篇幅，不能罄所欲言，殊屬憾事。今特再舉所知，另起爐灶，儘量紀錄，以補前者所未及。并就參加革命工作之華僑各區分爲九部：一曰香港之部，二曰檀香山之部，三曰日本之部，四曰越南暹羅之部，五曰美國之部，六曰南洋英荷二屬之部，七曰緬甸之部，八曰加拿大之部，九曰其他各部。自甲午興中會成立以迄辛亥武昌革命軍興之十八年間，舉凡各地華僑之俠行義舉，大略盡於是矣。間有未及畢述者，則

已詳載於拙著中華民國開國前革命史及革命逸史二書。大有供給讀者參考之價值。海內外諸同盟有能以短篇隻字匡余不逮者乎，余更引領望之。

中華民國三十四年十一月一日馮自由序於陪都。

華僑革命開國史略

一 香港之部

香港爲我國革命黨人之策源地，孫中山先生（以下概稱總理）自甲午（民國前十八年）創立興中會，以迄辛亥中華民國成立之十八年間，中間經過乙未（民國前十七年）九月廣州之役，庚子（民國前十二年）閏八月惠州三洲田之役，壬寅（民國前十年）除夕廣州洪全福之役，丁未（民國前五年）四月潮州黃岡之役，又同月惠州七女湖之役，又七月欽州防城之役，又九月惠州汕尾之役，庚戌（民國前二年）正月廣州新軍之役，辛亥三月廣州黃花崗之役，又九月廣東光復之役等等，皆利用香港爲出發點，是即歷屆我國革命軍之大本營所在地也。在此十八年間，革命黨在香港之各種組織，有報館，有書報社，有學校，有商店，有俱樂部，有農牧場，有招待所諸種名目，不一而足。茲分別敘述，以見當日革命黨人之艱難締造焉。

（一）楊耀記商號

孫總理於丁亥年（民國前二十五年）由廣州博濟醫學院轉學於香港雅麗士醫學院。嘗在港



中物色同志，以當日民智閉塞，在修學初期中，聞其革命排滿言論而贊成者，僅有陳白尤列楊鶴齡三人。陳字少白，新會縣人，廣州格致書院（即今之嶺南大學）開創時第一期學生，其父子橋之友區鳳墀爲總理漢文教師，以其英偉有志，乃介紹至香港訪謁總理，白晤總理後，大爲傾倒，總理勸其改入醫校，以便晨夕切磋，白以是遷港，與總理同學二載，最爲相得。尤列字少紈，順德縣人，廣州廣雅書院與圖學堂測繪科學生，自幼好與洪門會黨遊，早年以博濟醫院畢業生族人尤裕堂之介，與總理認識，時任香港華民政務司署文案。楊鶴齡爲香山翠亨村人，與總理同鄉同里，相識最早，家世富厚性頗不羈，有祖產商店在香港歌賦街，曰楊耀記。總理習醫時頗以在校談論時政不便爲苦，商諸鶴齡，鶴齡乃在店內特闢一樓爲同志聚談之所。總理課餘恆偕白列鶴齡三人談反清逐滿及太平天國遺事，放言無忌，聞者動容。因是親友商夥咸呼總理爲洪秀全，又稱孫陳尤楊四人爲四大寇。同志鄭士良陸皓東等來往廣州時，曾修治觀音山文瀾閣，以款接白列鶴齡三人，題曰四寇樓，即紀念昔年香港楊耀記之革命談話所云。

（一）輔仁文社

輔仁文社者，香港僑商有志者所組織之小俱樂部也，成立於民前二十二年庚寅（八九

○)，其時去中法甲申（民國前二十八年）之役未遠，國人漸知滿清政府之不足恃，及研究新學之必要。港僑中遂有福建海澄縣人楊飛鴻（字衢雲）、廣東開平縣人謝讚泰（字處知）二人，聯絡有志者劉燕賓、陳芬、黃國瑜、羅文玉、胡幹之、周昭岳等十六人，發起輔仁文社，以開通民智討論時事爲宗旨，是爲港僑設立新學團體之先河。其開會地點，初假劉燕賓所開之炳記船務公司爲之，至壬辰年（民國前二十年）二月十五日始開設會所於百子星第一號二樓，此社內容僅在多購置新學書報，以開通民智，尙未含有政治上之激烈性質，然是時風氣仍極閉塞，聞者僉以洋化二字譏之，且時不免香港警吏之窺伺也。衢雲爲人仁厚和藹，行俠好義，尤富愛國思想，時充任沙宜洋行副經理，於壬辰年始漸與總理相識，一見如故，時爲總理在雅麗士醫學校最後修學之一年，故該校時有衢雲之足跡。及乙未正月總理自檀島歸抵香港，謀擴大興中會之組織，親訪衢雲約其合作，衢雲欣然從之。輔仁文社社員加入興中會者，衢雲以外尙有謝讚泰周昭岳等數人。

（二）興中會總部乾亨行

乙未正月初旬 孫總理自檀香山返抵香港，卽召集舊友陸皓東鄭士良陳少白楊鶴齡尤列諸人，擬聯合各地同志擴大興中會之組織，以利進行，且將在檀香山所訂章程九條修改爲十條，因素知輔仁文社社員楊衢雲謝讚泰等平日宗旨相同，遂與接洽組黨事件，衢雲等欣然贊成。港僑

於初期陸續加入者，尚有黃詠襄周昭仁歌鳳墀余育之徐善亭朱貴全丘四等數十人。籌備既竣，即於是月下旬租定中環士丹頓門牌十三號爲總會所，榜其名曰乾亨行。旋於二十七日開成立大會，會名仍稱興中會，凡入會者須一律舉手向天宣誓，其誓詞曰，驅除韃虜，收復中華，創立合衆政府，倘有二心，神明鑒察。會所成立後，衆議決定在廣州尅期大舉，推定總理駐廣州專任軍事，鄭士良陸皓東鄧蔭南陳少白等佐之，衛雲駐香港專任後方接應及財政事務，謝讚泰黃詠襄等佐之。二月二十日復議決挑選健兒三千人由港乘船至廣州起事之策略。陸皓東提議用青天白日旗以代滿清之黃龍旗，亦於是日通過。由是總理遂於廣州發起農學會，以爲進行機關。粵垣官紳列名贊助者數十人，故無人疑爲挾有危險性質者。是秋七月各方運動將次成熟，衆以乾亨行漸有暗探窺伺，遂於是月初八日撤消之。八月二十二日衆以發難在即，始投票選舉會長，名之曰伯理璽天德，此職卽起事後之合衆政府大總統也。時會中分孫楊兩派，衛雲欲得此席甚力。總理不欲因此惹起黨內糾紛，表示退讓，力誠士良少白等勿與競爭，結果此席爲衛雲所得。九月重陽之役既敗，事詳余著中華民國開國前革命史，不贅，香港大本營全體瓦解。至己亥（民國前十三年）冬，總理自日本派少白至港發刊中國日報，爲興中會宣傳機關。十二月湘人畢永年與哥老會龍頭李雲彪楊鴻鈞張堯卿辜天佑等有聯合各省祕密會黨，奉總理爲大首領之議，衛雲聞之，乃向衆辭職，並荐總理自代。未幾興中三合哥老三會各派代表在港開會，同舉總理爲總會長，並特製總會長印章，由日人官崎寅藏齋往橫濱上諸總

理。庚子（民國前十二年）夏秋間興中會復策劃廣州惠州之軍事，因之黨務亦大形進步。及八九月間鄧士良鄧蔭南史堅如等相繼失敗，衢雲且被清吏派人暗殺，興中會元氣大傷，黨務殆陷於完全停頓，祇餘中國日報尙能發揮正論，日向清廷及保皇黨徒作堅苦之奮鬥而已。茲錄香港總部修正之興中會章程十條如左。

中國積弱，至今極矣，上則因循苟且，粉飾虛張下，則蒙昧無知，鮮能遠慮，堂堂華國，不齒於列強；濟濟衣裳，被輕於異族，有志之士，能不痛心。夫以四百兆人民之衆，數萬里土地之饒，本可發奮爲雄，無敵於天下。乃以政治不修，綱維敗壞，朝廷則鬻爵賣官，公行賄賂；官府則剝民刮地，暴過虎狼，盜賊橫行，饑饉交集，哀鴻遍野，民不聊生，嗚呼慘哉！方今強鄰環列，虎視鷹瞵，久垂涎我中華五金之富，物產之繁，蠶食鯨吞，已效於踵接，瓜分豆剖，實堪慮於目前，嗚呼危哉！有心人不禁大聲疾呼，亟拯斯民於水火，切扶大廈之將傾，庶我子子孫孫，或免奴隸他族。用特集志士以興中，協賢豪而共濟。仰諸同志，盍自勉旃。謹訂章程，臚列如左。

一 會名宜正也 本會名曰興中會，總會設在中國，分會散設各地。

二 本旨宜明也 本會之設，專爲連絡中外有志華人講求富強之學，以振興中華，維持國體起見。蓋中國今日政治日非，綱維日壞，強鄰欺侮百姓，其原皆由衆心不一，祇圖目前之私，不顧長久大局。不思中國一旦爲人分裂，則子子孫孫世爲奴隸，身家性命且不保乎？

急莫急於此，私莫私於此，而舉國憤憤，無人悟之，無人挽之，此禍豈能倖免！倘不及早維持，乘時奮發，則數千年聲名文物之邦，累世代冠裳禮義之族，從以淪亡，由茲泯滅，是誰之咎，識時賢者，能無責乎！故特聯結四方賢才志士，切實講求當今富國強兵之學，化民成俗之經，力爲推廣，曉諭愚蒙。務使舉國之人，皆能通曉，聯智愚爲一心，合遐邇爲一德，羣策羣力，投大遺艱，則中國雖危，無難救挽，所謂民爲邦本，本固邦甯也。

三 志向宜定也 本會擬辦之專務，須利國益民者方能行之，如設報館以開風氣，立學校以育人才，與大利以厚民生，除積弊以培國脈等事，皆當惟力是視，逐漸舉行，以期上匡國家，以臻隆治，下維黎庶，以絕苛殘。必使吾中國四百兆生民各得其所，方爲滿志。倘有藉端尋弊，結黨行私，或畛域互分，彼此歧視，皆非本會志向，宜痛絕之，以昭大公，而杜流弊。

四 人員宜得也 本會按年公舉辦理人員一次，務擇品學兼優才能通達者。推一人爲總辦，一人爲幫辦，一人爲管庫，一人爲華文文案，一人爲洋文文案，十人爲董事，以司會中事務。凡舉辦一事，必齊集會員五人，董事十人，公議妥善，然後施行。

五 交友宜擇也 本會收接會友，務要由舊會友二人薦引，經董事察其心地光明，確知大義，有心愛戴中國，肯爲其父母邦竭力，維持中國，以臻強盛之地，然後由董事帶之入會。必要當衆自承其甘願入會，一心一德，矢信矢忠，共挽中國危局，親填名冊，並卽繳會底銀

五元，由總會發給憑照收執，以昭信守，是爲會友。若各處支會，則該處會員暫發收條，俟將會底銀繳報總會討給憑照，後換交。

六 支會宜廣也 四方有志之士，皆可仿照章程，隨處自行立會，惟不能在一處地方分立兩會。無論會友多至幾何，皆須合而爲一。又凡每處新立一會，至少須有會友十五人，方算成會。其成會之初，所有繳底領照各事，必須託附近老會代爲轉達總會，待總會結照認妥，然後該支會方能與總會互通消息。

七 人才宜集也 本會需材孔亟，會友散處四方，自當隨時隨地物色賢才，無論中外各國人士，倘有心益世，肯爲中國盡力，皆得收入會中。將來用人時，各會可修書薦至總會，以資贊助，故今日廣爲搜集，乃各會之職司也。

八 款項宜籌也 本會所辦各事，事體重大，需款浩繁，故特設銀會，以資鉅集，用濟公家之急，兼爲股友生財捷徑，一舉兩得，誠善舉也。各會友好義急公，自能惟力是視，集腋成裘，以助一臂。茲將辦法節略於後，每股科銀十元，認一股至萬股，皆隨各便。所科股銀，由各處總辦管庫代收，發給收條爲據，將銀暫存銀行，待總會收股時，卽彙寄至總會收入，給發銀會股票，由各處總辦換交各友收存。開會之時，每股可收回本利百元，此於公私皆有裨益，各友咸具愛國之誠，當踴躍從事，比之捐頂子，買翎枝，有去無還，洵隔天壤，且十可報百，萬可圖億，利莫大焉，機不可失也。

九 公所宜設也 各處支會當設一公所，爲會員辦公之處，以便各友時到敍談，講求與中良法，討論當今時事，考究各國政治，各抒己見，互勉進益。不得在此博奕遊戲，暨行一切無益之事，其經費由會友按數捐支。

十 變通宜善也 以上各項，爲本會開辦之大綱，各處支會自當仿爲辦理。至於詳細節目，各有所宜，各處支會可隨地變通，別立規條，務臻妥善。

(四) 中國日報

中國日報爲革命黨組織言論機關之元祖，孫總理於己亥年（民國十三年）秋間始派同志陳少白至香港籌辦進行，所有機器鉛字概由總理在橫濱購運。至是年十二月下旬乃告出版，其社址設於士丹利街二十四號，少白自任社長。初期助理筆政者，有洪孝充、陸伯周、楊肖歐、陳春生、黃魯逸諸人，初以不審英人對華政策所在，未敢公然大倡革命排滿之說，半載後措辭始漸激烈。從前各地中文報紙排印俱用長行直行，獨中國日報首仿日本報式，作橫行短行，令讀着耳目爲之一新。此報除日刊外，兼出十日刊一種，定名中國旬報，附以鼓吹錄，專以遊戲文章歌謠譏刺時政，是爲吾國報紙設置諧文歌謠之濫觴。庚子（民國前十二年）興中會迭謀策動廣州惠州軍事，其大本營即設於報社三樓，黨人出入，絡繹不絕。及是歲閏八月惠州三洲田一軍敗挫，報社財政亦形不支，賴同志富商李紀堂源源供應，得免歇業。辛丑壬寅癸卯甲

辰（民國前八年至十一年）之四年，人心漸趨革命，報務日形發達。是時先後主持筆政者，復有鄭貫公、陳詩仲、黃世仲、馮自由、王軍、盧少歧、丁雨宸、梁襄武、何冰南、何雅選、盧信、廖平子諸人。國內外地報館之高唱民族主義，與中國報相呼應者，亦繽紛並起。惟報社度支至癸卯年夏竟無法撐持，不得已合併於著名文具印刷店之文裕堂有限公司，得以暫維現狀。新公司設總理三人，少白與李紀堂、容星橋分任之，星橋亦與中會員也。乙巳年（民國前七年）秋同盟會成立，總理派馮自由、白回港，佐少白辦理黨務報務，同盟分會亦附設於報館社長室。丙午年（民國前六年）秋文裕堂營業虧折，淪於破產，中國報以連帶關係，亦遭連同拍賣之厄。幸事前馮自由約同志李紀堂、李煜堂數人，集資預向文裕堂承購報社全部產業，始不致為保皇黨人所攬奪。是歲八月中國報改組，同時遷至上環德輔道三百〇一號，衆舉馮自由繼任社長，兼同盟分會會長。自後數年，報務黨務均具長足之進步。關於西南各省之軍務，如丁未（民國前五年）四月潮州黃崗之役，及同月惠州七女湖之役，五月廣州劉思復之謀炸李準，九月惠州汕尾運械之役等等，皆由同盟分會發動之。此外如欽廉鎮南關河口諸役，莫不由中國報報道消息，故此報實不啻為全國革命黨人之總樞紐，其銷數之多寡，與人心之趨向革命與否為正比例焉。己酉（民國前三年）冬同盟會南方支部成立，漸與香港分會劃分權限，自後關於軍務及香港以外之黨務由南方支部處理之。未幾遂有庚戌（民國前二年）新正廣州新軍反正之一役，是役既敗，民黨元氣大傷，中國報原屬商辦性質，馮自由以羅掘俱窮，無力再辦，乃請南方支部特撥公款

維持善後，自赴加拿大就溫高華埠大漢日報之聘。南方支部於是改派李以衡爲經理，謝英伯、張紹軒等爲編輯。自癸卯後文裕堂合併時代至丙午後馮自由經理時代之七年間，中國報資本概由同志商人負擔，及庚戌二月以後，始由南方支部派人經理。其後南方支部以支應浩繁，不勝其擾，至辛亥（民國前一年）春，適有留美黨員李其歸國，支部乃以中國報經理一席畀之。是歲五月檀香山黨員盧信黃時初等願集僑資負責接辦中國日報，支部許之。及九月粵省光復，報社遷於廣州，至民國二年八月龍濟光入寇，遂被封禁停版。要之中國報歷史可區別爲三期，從己酉至乙巳之七年爲陳少白處理時期，從丙午至己酉之四年爲馮自由處理時期，從庚戌至辛亥之二年爲南方支部處理時期。以十三年三期間之大聲疾呼，卒能領導海內外輿論以傾覆清廷，重光漢業，殊非當日參預諸子所及料也。

（五）大明順天國總機關和記棧

和記棧者，太平順天國在香港秘密籌劃起事之總機關也。其地在中環德忌笠街二十號四樓。先是興中會會員謝讚泰、李紀堂久欲在粵舉兵革命，以逐漸與漢爲宗旨，嗣結識太平天王洪秀全族弟春魁，認爲足以同舉大事之適當人物，遂推爲首領，並預定國號曰太平順天國。春魁以是易名全福，示藉洪秀全福蔭之意，紀堂於是役慨然負擔全部軍餉五十萬元。全福受命後，先後分派梁慕光、李植生、馮通明、宋居仁、蘇子山（原名龔超）、庚子漢口富有票案有名）諸人，在廣

州惠州北江各地聯絡軍隊，尅期於壬寅（民前十年）十二月除夕各方同時發難，其發號施令皆在和記棧處理之。及十二月下旬籌備略竣，全福先期赴粵指揮梁慕光等各項動作，讚泰紀堂等亦各預定除夕晚乘輪詣省主持一切，詎有奸人周某爲誑騙巨款事遽向香港警廳告密，且引警吏至和記棧搜查舉發，並逮捕同志五人，而機事遂全局敗露。粵督德壽藉此破獲各黨人機關，捕殺黨人多名，全福等半載之經營悉成水泡。在港被捕各黨人，得英國殖民部電令港督，以國事犯待遇，故由港督下令開釋。全福前於太平天國敗後，嘗從事航海生活多年，春秋既高，乃在港行醫自給，是役失利，遂避地新加坡，旋以病返就醫，死於香港國家醫院，年六十有九。

（六）世界公益報

繼中國日報出版後三年而出版，有世界公益報焉。是報發刊於癸卯年（民前九年）冬，爲中國報前記者鄭貫公所主編。其資本全出諸耶穌教徒林護馮活泉譚民三等，編輯人有李大醒崔通約黃世仲黃伯耀黃魯逸等。報中論調略同中國報，而色采不如中國報之鮮明，特注重談諧文字及諷刺圖畫，於宣傳革命，亦甚有力，世稱香港革命黨報之第二家者是也。貫公爲人豪邁不羈，任職半載，以不願受耶教範圍之拘束，卽辭職他去。此報因有耶教徒支持，基址鞏固，至民國成立後數年始停刊，其功僅次於中國報。

(七) 廣東日報

廣東日報亦爲前香港中國日報記者鄭貫公所創辦。貫公於癸卯年冬發刊世界公益報後，因報中股東及董事多屬耶穌教徒，發言立論多不自由，故於公益報出版後半載，卽自行辭職，復向同志另集資本，組織廣東日報以爲之繼，宗旨略同中國日報，是爲香港革命報紙之第三種。其編輯部嘗羅致廣州文學之士多人擔任莊諧二部，著述體裁頗爲新穎，操筆政者，除貫公自任主編外，尙有黃世仲、王軍演、胡子晉、陳樹人、盧偉臣、勞偉孟諸人。出版後大受廣州香港澳門各地學界之歡迎，銷場亦殊不惡，惟以資本不足，開辦不及一年，至乙巳夏秋間卽告歇業，聞者惜之。

(八) 九龍光漢學校

光漢學校成立於甲辰乙巳（民國前七八年）年間，校址在九龍油麻地，爲一部革命志士所組織，校長史古愚，時易名張篠然，乃史堅如烈士之長兄。此外有體育教員李自重，數學及衛生教員伍漢持，英文及地理教員陳典方（陳少白族弟），經費來源多由同志商人李紀堂、李煜堂等負擔。紀堂係香港有名富商，煜堂則永利源藥材行東主，卽體育教員李自重之父也。此校最注重軍國民教育，癸卯（民前九年）總理在東京設立革命軍事學校以訓導青年同志，自重爲

十四學生之一。該校解散後，自重旋歸香港，與史伍陳諸人創立此校，首以振興尙武精神，提倡兵式體操爲宗旨，因港律不許民間藏貯火鎗，故用木棍代之。自光漢學校實行軍事教育後，全港各學校翕然從風，如雅麗士醫學院及各著名學校咸先後延聘李自重及光漢學生爲體操教員，港政府所設之皇仁學院亦用英國兵官教練，行之半載，全港中小學生皆具赳赳桓桓之概。時有育才書社，爲屈臣氏西藥房買辦兼潔淨局議員劉鑄伯所創辦，亦延自重教授體育。適自重因擔任各校課程過勞辭退該校之聘。鑄伯以是深懷不滿，遽向港華民政務司進讒，謂自重自稱大將軍，所倡辦軍事教育，實於英國不利等語。港當局竟爲所惑，遂下令禁止各學校設置體育一科，且欲驅逐自重出境，自重聞訊，乃先期赴粵避之，并肄業於光華醫學校學習醫術。自茲而後，香港各學校遂不聞設置體育一科，至民國成立後多年，亦沿襲奴化教育，毫無改革，殊可惜也。光漢學校於自重離港後數月亦相繼解散。

(九) 九龍青山農場

與中會員鄧蔭南自乙未及庚子廣州二役失敗後，卽以檀香山攜回餘資在九龍青山屯門一農場，經營墾殖畜牧事業，爲久居之計。越年號稱革命富翁之李紀堂亦在陰南農場之側購地數百畝，經營同一事業，其規模較蔭南更爲偉大，且在香港中環街市內開一銷售農產品之商店，名青山棧，每日以小輪往來香港青山間，輸運蔬菜瓜果鷄鴨等物至青山棧出售。所產雞蛋大而

精美，西人多喜購之。歷年黨人陳少白馮自由李自重史古愚劉思復汪兆銘黎仲實喻雲紀諸人試驗鎗炮炸彈諸危險品，時假該二農場爲之，以其地僻靜，不虞有警吏窺伺也。丁未（民元前五年）潮州黃岡及惠州七女湖汕尾三役敗將許雪秋李子偉陳純林旺等亡命逃港，爲清探跟踪尾追，馮自由乃遣許等匿居該二農場以避之。入民國後數年，蔭南以佐總理任大元帥府別動隊司令，乃捨棄其農場不顧。青山棧續維持至民國後十餘年，紀堂家道中落，全賴農場供給，二十年後始頂讓與人云。

（十）有所謂報

香港廣東日報停刊後數月，即乙巳年秋間，鄭貫公復創辦一種小規模之日報，名「有所謂唯一趣報」。內容莊諧並重，專以小品文字見長，其排字印刷均假手其他印務公司爲之，故不用自置鉛字機器等物，又不須多大資本，取價低廉，趣味濃厚。出版未久，即已風行一時，其銷路竟駕諸大報而上之，是爲香港廣州二地小型報紙之濫觴，亦爲當地革命報紙之第四種。是報操筆政者除貫公外，有黃世仲陳樹人（猛邁）胡子晉（駁男）盧星父（仙乎）盧偉臣王秋涓（軍演）駱漢存諸人，英才濟濟，可稱一時之盛。當乙巳丙午（民前六七年）間，港人曾先後發起馮夏威陳天華兩烈士追悼會於西營盤杏花樓，參加者數千人，此兩會皆由鄭貫公等主持，實隱然執全港新學界之牛耳。及丙午夏貫公忽染疫逝世，讀者莫不惋惜，是報以乏人支持，旋

改組爲東方報。

(十一) 同盟會及南方支部

香港中國同盟會成立於乙巳年秋冬間，是歲六月杪，孫總理創設同盟會本部於東京，八月初十日首派馮自由李自重二人至香港廣州澳門等處組織分會。馮抵港卽與陳少白籌商改組興中會爲同盟會，新舊同志先後加盟者，有陳少白李紀堂容星橋鄧蔭南鄭貫公李自重黃世仲陳樹八李樹芬鄧警亞盧信廖豐子溫少雄梁擴凡李孟哲李伯海諸人。衆舉陳少白爲會長，鄭貫公爲庶務，馮自由爲書記，黃世仲爲交際，會所卽假中國日報社長室爲之。香港分會向例須兼西南各省之軍務黨務，及南美洲各地之交通事務，故分會長一職極爲重要。成立未久，總理卽由日本赴南洋，船過港時在舟中召集同志開黨務會議，及十一月黃克強亦來，旋繞道赴桂林擬策動清防營統領郭人漳反正，此外鄂人吳崑湘人梅寬化李燮和等因公來往湘桂鄂粵諸省，均由香港分會招待之。

丙午（民國前六年）八月中國報改組，陳少白同盟會長職，衆舉馮自由代之。次年丁未爲同盟會在西南各省軍事最活動之時期，總理先後派胡漢民汪兆銘二人駐港協助馮自由進行一切。時受任發動廣惠潮梅欽廉各屬軍務者，有許雪秋黃耀廷鄧子瑜余紹卿劉思復王和順諸人，分派各方協助者，則有方瑞麟喬義生方漢成李思唐郭公接方次石李次溫池亨吉萱野長知

(汕蒼均日人)謝良牧謝逸橋張煊張谷山張樹楠朱執信胡毅生阿克夫譚劍英莫偉軍柳楊谷鄧慕韓劉樾杭諸人，在諸受任發動人中，許雪秋曾於是年二月策勸潮州饒平浮生埠會黨奪取潮州府城，屆時偶值風雨大作，不能集合而止。四月復策勸余既成陳湧波等在潮州黃岡城舉事，以械劣失敗。九月日人萱野長知租用日輪幸運丸載運大量軍械駛至惠州汕尾海面，港分會預派雪秋屆時接械大舉，雪秋以措置不善致誤事機。鄧子瑜則擔任惠州發難之責，嘗遣林旺陳純孫穩等起事於歸善縣七女湖，與清軍轉戰十餘日，至彈藥告竭始散。劉思復於四月杪入廣州謀炸清提督李準，以響應潮惠之師，詎於月初一日因裝置炸彈失慎，斷去一臂，爲警吏拘捕入獄。以上數役爲港分會直接指揮之軍事。其他八月欽州防城之役及戊申(民國前四年)二月欽州馬篤山之役，則由總理在越南河內親自發動，港分會祇任供應軍用品之責而已。故丁未戊申兩年同爲港分會處理軍務最殷繁之時期。而丁未尤爲緊張，各方同志來往港地者，幾於應接不暇，因是於中國報社之外，另在堅道及普慶坊，摩理臣山道，灣仔進教圍，皇后大道各街，分設招待所多處以收容之。至於黨務亦異常發達，先後派出代理主盟員及軍事聯絡員多人，分赴廣州虎門黃埔澳門潮汕歸善博羅梅縣興甯連州北海梧州潯州柳州南甯廈門各地發展黨務，及聯絡軍隊。各方同志於此兩年相繼加盟者有張谷山姚雨平何克夫譚劍英莫偉君黃旭昇陳佐平溫子純陳純林旺孫穩詹承波吳金標余既成余通陳湧波林英俠蕭竹漪余子偉許佛童陳二九林伍張八傑(靜江)周覺(伯年)倪映典方紫柵黃伯淑李煜堂謝英伯巴澤憲盧岳生李海雲葛謙譚馥嚴國豐曾傳範黎

粵羅樹霖楊希說周毅軍李濟民蕭惠長劉古香張鐵臣韋立權劉培嶽林菊秋等千餘人，及戊申冬十一月，湘人葛謙譚馥等欲乘清帝后逝世，運動駐廣州防營反正，葛親至香港謁馮自由致電總理接濟，並邀黃克強譚人鳳二人來粵主持，馮葛未得總理覆電而事洩，全局瓦解，葛謙嚴國農譚馥等死之。港粵同志乃秘密開會追悼，並醮款卹其遺族。

己酉（民國前三年）以前港分會忙於軍事，不便大張旗鼓招攬黨員，以避偵探耳目。自戊申三月河口革命軍失敗，同盟會元氣大傷，軍事進行因之停頓一年有餘，遂得專心黨務，改取開放主義，以廣收同志爲務。是年二月特闢新會所於德輔道先施公司對門某樓，榜其名曰民生書報社，黨員日常開會不復如前之秘密。另在廣州市垣河南分設機關名守真閣，由高劍父潘達微徐宗漢朱述唐梁煥真等籌備成立，會務亦頗發達。是年港粵兩地加盟者，有劉一偉陳元英馬達臣譚民三李以衡陳逸川黃軒胄關非一何麗臣何創士梁煥真何輯民陳自覺梁藻如杜蕪漢陳瑞雲蔡忠信潘達賢莫紀彭李文甫林直勉羅道膺黃俠毅張志林陳哲梅何振馬小進易俠胡津林廖俠劉守初陳俊朋李昌漢李文啓李少穆朱潤芝洪承銓陳恭譜麥瑞祺陳炯明黃洪昆王占魁江運春尤龍標甘永宣易培之黃宗漢蘇美才孫武等二千餘人，就中以倪映典所招致新軍兵士居多數，惟無名冊可考。至十一月民生書報社以會所過狹，復遷於中環德輔道捷發號四樓，易名少年書報社。庚戌（民國前二年）春馮自由因改就雲高華埠大漢日報之聘，辭退會長一職，衆舉謝英伯承乏，謝於辛亥年夏赴檀香山，由陳逸川代理會長。

己酉秋冬間同盟會南方支部成立，與港分會劃分職權，自後西南各省黨務軍事由支部主之，香港一方黨務由分會主之。衆舉胡漢民爲支部長，汪兆銘爲書記，林直勉爲司庫。冬十一月倪映典自廣州來港報告運動廣州新軍成績，衆決議大舉，卽電駐美國孫總理請求接濟，並邀黃克強趙聲譚人鳳來港主持，十二月間黃趙譚先後到港，總理自美國三次電匯到八千元，同志李海雲亦提其商號存款二萬餘元以充義舉，衆以籌備成熟，定期庚戌正月初旬大舉。詎因新軍兵士於除夕以購名片細故，與警察發生爭執，遽成軍警互相毆鬪之大風潮，粵督袁樹勛聞變，立派防營彈壓，遂成敵國。倪映典初擬勸新軍勿遽暴動債事，及正月初二早抵燕塘，知大勢無可挽救，遂毅然領導全軍發難，以各鎗枝扳機及彈藥早爲清吏審令繳去，致戰鬪力全部損失，遂爲清軍所敗，竟以身殉之，是役功敗垂成，詢爲歷次義軍之最大憾事。南方支部經此失敗，黃克強趙聲胡漢民等乃赴南洋檳榔嶼謁總理籌劃再舉。是年冬總理號召各埠同志，擬集巨款作捲土重來之計，南洋美洲諸地黨員均如響應，踴躍以從，黃趙胡等遂返港設置革命軍統籌部以策動一切，是即辛亥三月二十九廣州黃花岡之役，實佔全部革命史最輝煌之一頁。是役香港及各方往來同志莫不奔走駭汗，爲義師盡力，其壯勇義烈可歌可泣之事迹，已有專書紀錄，茲不贅述。及是歲八月武昌革命軍起，南方支部先後遣派黨員分赴全省各路策動響應，而駐港各同志亦多自動赴義，惟恐不力，用成辛亥九月廣東省城不流血而收功之殊勛，是則香港同盟會員多年奮鬪之結果，不容湮沒者也。

(十二) 東方日報

鄭貫公逝世後，香港有所謂小報乏人領導，勢將停刊，同志劉思復陳樹人胡子晉謝英伯易俠等乃另集資本接辦有所謂報，重新改組，易名曰東方報，其體裁與前有所謂報略同，亦一小規模之日報也。此報發刊半載，即以資本不繼停版，時在丙午秋至丁未年春。

(十三) 少年日報

香港有所謂報停刊後，該報編輯人分爲兩派，各續辦小報以爲之繼，一爲東方報一爲少年報，均與有所謂報同一體裁。少年報發刊於丙午丁未年間，地址在上環海旁，主編爲前中國日報記者黃世仲，康蔭田楊計伯盧星符等佐之。世仲所著太平天國演義小說初在有所謂報登載，此報繼續載之，其銷路足與有所謂報相伯仲，惜乎出版未及一載，即因款絀停版。

(十四) 時事畫報

時事畫報原在廣州出版，發刊於乙巳年，爲粵省名畫家潘達徵高劍父等創辦，圖畫以外，附載時事論評及諧談小說等類，由陳垣岑學侶謝英伯等擔任，以幽默之措辭鼓動民族思想，頗能刺激人心，誘導社會，出世未久，風行一時，旋以資金缺乏停刊。己酉年秋間，謝英伯潘達徵

何劍士鄭侶泉等得林直勉之資助，重組是報於香港，仍用石版印刷，以在香港言論較粵省自由，所載諷刺圖畫及時評論著，均爲抨擊清政宣導革命之作，惜刊至十餘期而止。

(十五) 灣仔馮宅

在丙午年至庚戌年（民前一年至二年）以前，香港革命黨人所有秘密文件及軍械炸藥等多貯藏於中國報館密室內，至於每次軍事之發號施令，及與各方黨人接洽事件，恆假報館四樓之社長室處理之。四樓分爲兩部，後半部充社長室，前半部則爲社長馮自由眷屬住宅。胡漢民夫妻來往香港亦常下榻其間。及己酉（民前三年）春，同盟會以暫時軍務停頓，遂改取開放門戶政策，大舉收攬黨員，因之漸惹起警探之窺伺。是歲秋馮自由乃遷眷屬於灣仔東海旁街七十六號四樓榜其名曰馮宅，前存中國報之危險品物亦統藏是間，胡漢民汪兆銘黎仲實喻培倫朱執信徐宗漢倪映典黃克強趙聲劉岐山黃隆生孫武譚人鳳林時爽程克王金發諸人蒞港，皆以馮宅爲東道主。是冬同盟會添設南方支部，以倪映典運動駐粵新軍三標漸臻成熟，決於明年庚戌正月大舉反正，黃克強趙聲譚人鳳先後到港策畫一切。馮宅卽爲祕密縫製革命軍旗幟及貯藏武器之供應所，十二月間由孫壽屏（總理胞兄）楊德初陳淑子（胡漢民夫人）盧桂屏（馮自由庶母）李自平（馮自由夫人）徐宗漢等在宅內各用縫衣機製成青天白日大紅三色旗百餘面，以供義軍之用，是卽庚戌正月廣州新軍舉義時倪映典所用，及在天官里宜安里機關被軍警搜獲之物也。是

役失敗後數月，馮自由旋赴美洲，馮寓由李自平女士主持，辛亥三月黃花崗一役，馮宅亦供貯藏軍械之用云。

(十六) 金利源藥材行

辛亥三月二十九廣州一役前後，海外各地所匯義捐均寄香港文咸街金利源藥材行轉美國交革命軍統籌部出納課長李海雲收。金利源爲開設四十餘年之老商行，專營運土產藥材至舊金山，信用雄厚，爲香港藥材業之第一家，屬巨商李煜堂文啓兄弟所設。丙午（民國前六年）秋，中國日報受文裕堂公司破產之影響，瀕於被保皇黨擄奪之危機，馮自由乃向其外舅李煜堂求助，煜堂慨然集資，預向文裕堂承購中國報全部資產，而中國報賴以繼續出版，是爲煜堂與革命黨發生關係之開始。煜堂尙有直接經營之商店曰永利源號，亦以經營參茸爲業，丙午後中國報如遇有資金匱乏情事，恆由永利源號協助之，及庚戌（民國前二年）冬，永利源號歇業，煜堂之弟文啓及附設於金利源之遠同源外匯莊經理李海雲亦加盟於同盟會，海雲且被推爲革命軍統籌部出納課長，遂通知外洋各機關一律匯款於金利源，以免爲港吏所注意。蓋在庚戌夏馮自由離港以前，各處匯款均寄中國報，及馮渡美洲後，乃將匯款地點改爲金利源以資便利。辛亥夏秋間美洲洪門籌餉局成立，所匯金利源之義款爲數不貲，是年秋冬間，總理當選中華民國臨時大總統，其攜往南京預備就職日賞犒軍士之三十餘萬元，卽爲存貯金利源之義捐餘

款。時李海雲已任粵省官錢局局長，義捐餘款係由陳元英代理保管。又庚戌辛亥二年往來黨員，恆假金利源倉庫密藏武器及炸彈，店夥以爲危險，深爲疑懼，煜堂兄弟絕不措意，誠爲一般老商號之錚錚者，商店至今仍屹然存在，文啓年逾七十，港人今尙不知彼爲老革命黨也。

(十七) 支那暗殺團

庚戌正月廣州新軍一役失敗後，諸同志紛紛避地香港。是歲夏間劉思復謝英伯陳自覺朱述堂數人擬組織暗殺團，謀誅戮滿清大吏，以補助革命工作之進行，由思復起草章程，遴選極能負責而作事慎密之同志爲團員，發起人只有劉思復謝英伯陳自覺朱述堂高劍父程克陳炯明李熙斌等八人。其初租定般咸道一樓爲機關，定名曰支那暗殺團，繼爲製造爆裂品起見，更在油麻地再闢一樓，由徐宗漢李應生二同志居之。隨後繼續介紹入團者有宋銘黃（女）湘田（女）林冠慈施正甫張清譚敬岳周演明馬育航何報鴻梁倚神鄭岸父張綸張佐基潘賦西劉鏡源諸人，所製炸藥炸彈均攜往同志鄧蔭南之青山屯門農場分別試驗，威力強猛，可供實用。是歲六月團都由般咸道遷摩士忌街二十三號，衆議前次汪兆銘黃復生等謀炸清攝政王載禮不成，本團應派員北上完成此項工作，公推劉恩復朱述堂李熙斌程克四人赴北京執行載禮死刑。一面由熙斌返廣州變產籌款供北上經費，程克自告奮勇，願先首途籌備一切。程河南人，留日學生，己酉年冬因在廣東刺殺政府密探，亡命至港，蜷伏多時，衆信之不疑，給與旅費六炸藥十磅，使抵京後即傳

報消息，以便各團員繼續出發，詎程於九月首途後，杳無消息，數托燕滬同志調查，均無迹象可尋，衆大疑慮，北上之行因之擱淺。

辛亥三月二十九廣州一役之前，團員知大舉在即，不便進行特殊工作，致影響全局，故暫停動作。及是役失敗，衆遂決議執行粵督張鳴岐及水師提督李準二人之死刑，先後推定林冠慈、陳敬岳、潘賦西、劉鏡源四人爲執行員，朱述堂、李熙斌、高劍父、李少華、梁倚神、馬育航、周演明、張綸、施正甫、張清譚、張佐基、何報鴻等爲輔助員，分途進行，炸彈中一部由馬育航、周演明、張綸等祕密攜至廣州。時張鳴岐深居簡出，不易下手，衆乃集其目標於李準一人，至閏六月十九日，衆探知李準必外出，林冠慈、陳敬岳、潘賦西各分路截擊，劉鏡源到稍遲未加入。李準至雙門底，林連舉四炸彈向其坐轎擲之，轎毀，李傷臥地上，斷脅骨二，衛隊死傷者二十餘人，林亦中數鎗殉義。陳敬岳入大南門，聞爆炸聲，知別執行員已下手，乃轉入育賢街，以失路爲警察所疑，被捕，越日清吏審訊，直認不諱，卒被殺害。潘賦西以攝影鏡箱內藏兩炸彈，未遭人疑，逕至天字碼頭，僱小艇渡河，作失手狀，投鏡箱於水，得以無事。是役喪失林陳二同志，而李準重傷未死，不久醫愈，似屬得不償失。然是歲九月廣東之光復，以李準先期通款投誠，乃得不流血而收美果，不可謂非林慈一炸之力也。是歲八月武昌革命軍起，團部探悉新任清將軍鳳山定期來粵，遂派朱述堂、李熙斌、梁倚神等至廣州謀轟炸之，以促進各路義軍之發難，適黃克強亦派李應生、周之楨、李沛基等自港來粵，抱同一之目的，團員以宗旨相同，有互助之責，由梁倚神助其租

定房屋，以便行事，即倉前街某屋是也。九月四日鳳山抵廣州，同志已於期前定計分途轟炸之，團部派出趙灼文張樹二人爲執行員，預定在路上擲彈邀擊，李沛基則在倉前街機關守候，謀於鳳山大隊經過時，即以窗前所牽之大炸彈放下，同時白屋後避去。是晨得朱述堂來報鳳山入城確期，乃急準備行事，午前八時鳳山果輕裝滅從以過倉前街，沛基依計行事，彈落立爆，鳳山與其衛隊多人均炸斃，舖屋倒塌者六七家。關於李沛基轟炸鳳山事，詳見他項紀載，茲不贅述。時趙灼文等亦在別路守候截擊，聞爆炸聲，知已有人動手，遂返河南機關報告經過。粵省既光復，李熙斌應北伐軍總司令姚雨平之召，主持炸彈營事務，劉思復丁湘田鄭岸父等亦赴滬，擬北上轟炸滿清諸權要，以剪除革命軍之障礙，已而南北和議告成，全國統一，暗殺團於是宣佈解散。

二 檀香山之部

甲午（民國前十八年）冬，總理首創興中會於檀香山，自明年乙未廣州一役失敗後，黨勢驟形不振，總理對於國內之革命活動，除乃兄壽屏時常接濟外，各會員出資相助者寥寥無幾。及己酉（民前十年）總理爲梁超所愚，致書同志李昌黃亮李多馬何寬等爲梁介紹，使共商國是，李昌等誤信梁「名爲保皇實則革命」之說，多入彀中。由是檀島興中會殆陷於全部停頓之狀態。至癸卯（民元前九年）秋冬間，總理復蒞檀島，改組隆記報爲黨報，舉保皇邪說而廓清之，興中會之勢力蔚然復興。其後隆記報次第改組爲民生日報及自由新報，同盟會亦繼興中會而興，是爲革命黨在檀島之最隆盛時期。茲分別縷述如下：

（一）檀香山興中會

甲、興中會成立之經過 檀香山爲興中會最初之發源地，亦爲總理幼年之讀書所。甲午年（民國前十八年）夏六月中日二國以朝鮮東學黨事件，交涉破裂，時局嚴重，總理因至天津上書直督李鴻章條陳改革，李不能用，知滿清政府積弊重重無可救藥，非澈底改造決不足以救亡。遂於是歲秋間自上海重赴檀島，擬向舊日親友集資回國，實行反清復漢之義舉。總理

少在檀島耶教學校肄業，同學及故舊至衆，其兄德彰（原名眉字壽屏）爲茂宜島大畜牧家，牧場廣千數百畝，有茂宜王之稱。總理蒞檀後，先赴茂宜牧場就商於乃兄，德彰首贊成之，自願劃撥財產一部爲助，更移書檀中各親友爲總理先容。其時華僑風氣尙極閉塞，聞總理有作亂謀反言論，咸謂足以破家滅族，雖親戚故舊，亦多掩耳驚走。經總理多方遊說，奔走逾月，僅得同志數十人。冬十月間假卑涉銀行華經理何寬宅開第一次成立會，列席者有何寬李昌劉祥黃華恢程蔚南鄭金鄧松盛（號蔭南）鄭金鄭照黃亮鍾木賈許直臣李多馬李祿卓海林鑑泉鍾宇劉壽曹彩劉卓宋居仁夏百子侯艾泉李杞等二十餘人，總理爲主席，卽由總理提議定名曰興中會，規定以「振興中華挽救危局」爲宗旨，并宣佈所起草章程九條，衆無異議，遂依章程規定投票，選出永和泰商號司理劉祥及何寬二人爲檀埠本會正副主席，永和泰商號司賬黃華恢爲管庫，程蔚南許直臣爲正副文案，李昌鄭金鄧松盛黃亮李祿李多馬鍾宇林鑑泉等爲值理。章程內載每會員應納會底銀五元，另設銀會，集股舉辦公家事業，每股科銀十元，成功後收回本利百元。文中尙不便明言籌餉起兵字樣，以免會員有所戒懼。蓋其時華僑尙多不脫故鄉廬墓思想，惴惴於滿清所派公使領事之藉辭構陷也。會畢，總理令各會員填寫入會盟書，其辭曰：「聯盟人某省某縣人某某驅除薩虜恢復中國，創立合衆政府，倘有貳心，神明鑒察。」宣誓時由李昌朗誦誓辭，各以左手置耶教聖經上，舉右手向天依次讀之，如儀而散。自是陸續入會者尙有孫德彭楊文納楊德初衛黃益李光輝陸燦葉桂芳尹煜傅鄒德明容吉兆雷永照張福如許

帝有鄭仲昭、伍雲生、程祖安、劉森、陸望華、鄭發古、義等九十餘人，會員總數約一百三十人。

乙、募集軍資之成績 是月二十七日（陽曆十一月二十四日）開始收取會員底銀及銀會股銀，月餘所得僅美金千餘元，總理以事機日迫，急於返國，而所集寥寥之數，去所預算需要之數尚遠，爲是異常焦灼，德彰聞之，乃更以每頭六七元之價賤售其牛牲一部，以充義餉，鄧松盛亦盡變賣其商店及農場，表示一去不返之決心。同時總理爲使各會員同受軍事教育起見，特假其師芙蘭、縮文、牧師所設尋真書室校外操場，延一丹麥國人會到中國充當南洋練兵教習名柏者，教授各同志兵操，準備回國參加義軍，每星期操練二次，各會員受訓者，有侯艾泉、李杞、鄭金、鄭照、許直、臣杜、守傳、程辰、臣陸、燦等二十餘人。至十二月初旬，總理核算各項所得，約合香港銀一萬三千元，遂即束裝歸國。各會員先後返香港參加義舉者，有鄧松盛、宋居仁、夏百子、陳南、李杞、侯艾泉諸人，是爲乙未（民國前十七年）九月九日廣州首義之導火線。惟當日檀島各會員資產多非富裕，除服務當地官署及洋行外，或經營小商店，或開設小農場，實力殊不充厚，於總理歸國後，即不能有所接濟。總理於乙未秋敗挫後，是冬重渡檀島，計劃再舉，居檀多月，諸同志皆無以應之，故總理乃有美洲之遊。

丙、興中會之原始章程 興中會原始章程九條，經檀香山第一次成立日照原文通過，條文頗爲簡略，後經翌年乙未正月香港興中會總部略予修正，增爲十條，即現時坊間刻本所載興中會宣言書是也。按當時尙無「宣言書」三字之新名辭，應以原稱「章程」二字爲不失真，茲附

錄檀島興中會成立日議決之章程九條原文如左：

興中會章程（最初在檀香山議決原文）

中國積弱，非一日矣。上則因循苟且，粉飾虛張，下則蒙昧無知，鮮能遠慮，近之辱國喪師，剪藩壓境，堂堂華夏，不齒於鄰邦，文物冠裳，被輕於異族，有志之士，能無撫膺。夫以四百兆蒼生之衆，數萬里土地之饒，固可發奮爲雄，無敵於天下，乃以庸奴誤國，荼毒蒼生，一蹶不興，如斯之極。方今強隣環列，虎視鷹瞵，久垂涎於中華五金之富，物產之饒，蠶食鯨吞，已效尤於接踵，瓜分豆剖，實堪慮於目前。有心人不禁大聲疾呼，亟拯斯民於水火，均扶大廈之將傾，用特集會衆以興中，協賢豪以共濟，紓此時艱，奠我中夏，仰諸同志，盍自勉旃，謹訂規條，臚列如左。

一 是會之設，專爲振興中華，維持國體起見。蓋我中華受外國欺凌已非一日，皆由內外隔絕，上下之情罔通，國體抑損而不知，子民受制而無告。苦厄日深，爲害何極。茲特聯絡中外華人創興是會，以申民志，而扶國宗。

一 凡入會之人每名捐會底銀五元，另有義捐以助經費，隨人惟力是視，務宜踴躍赴義。

一 本會公舉正副主席各一位，正副文案各一位，管庫一位，值理八位，差委二位，以專司理會中事務。

一 每逢禮拜四晚本會集議一次，正副主席必要一位赴會方能開議。

一 凡會中所收會底各銀，必要由管庫存貯妥當，或貯銀行，以備有事調用。惟管庫須有殷商二名擔保，以昭鄭重。

一 凡會中捐助各銀皆爲幫助國家之用，在此不得動支，以省浮費。如或會中偶遇別事要用小費者，可由會友集議妥當，然後支給。

一 凡新入會者，須要會友一位引荐擔保，方得准他入會。

一 凡會內所議各事，當照捨少從公之例而行，以昭公允。

一 凡以上所定規條，各會友須要恪守。倘有善法，亦可隨時當衆議訂加增，以臻完美。

筆者按在甲午乙未年間，一般新名辭尙未通行，據該章程所載名辭，主席卽會長，文案卽書記，管庫卽會計，差委卽幹事，值理卽議員或董事，此皆香港華人翻譯英語之名稱，總理於起草章程仍襲用之耳。又如英文革命 (Revolution) 一語，舊譯造反。總理於乙未秋亡命至日本時始採用新譯，讀者於此，幸注意焉。

丁、檀香山收入之會費及義捐 查甲午年檀島興中會所保全之關係文件祇有副主席何寬珍藏多年之會費及義捐收支表數頁，題曰興中會會銀及收入會銀時日與進支表，嘗載於自由新報某年特刊紀念號「檀山華僑」前數頁，是爲興中會初期最有價值之證件。表中所載年月日全用

陽曆，由此可以測知與中會成立時期之梗概。表中所載收入會費之第一日爲一八九四年十一月二十四日，是日是否即爲成立之第一日，雖未加以說明，但就總理當日籌餉之迫切情形觀之，諒相差必不甚遠，茲將該進支表原文附錄於後。

與中會會銀及收入會銀時日與進支表

一八九四年十一月二十四日 何寬 李昌

同十一月二十八日 衛積益

同十一月二十九日 李光輝 黃綿鳳 何早 宋居仁

同十二月六日 劉卓林 鑑泉 李多馬 程恆心 曾勝 陳孟謙

同十二月七日 葉桂芳

同十二月十日 黃亮

同十二月十一日 鍾宇

同十二月十三日 程蔚南

同十二月二十日 尹煜傳 許直臣 夏百子 黃慶培

一八九五年正月三日 胡味 李月 陸望華 楊納 毛恩福

同正月十日 鄭發古 義

同正月十七日 梁賓

同正月二十一日 鄭仲昭歐陽晃許振黃二譚弼容天煦楊德初鄺全譚瑞容吉兆

孫眉陸檀生劉登黃卓山

鄧松盛介紹來支會友十五名列下

陳天養馮明鄧顯德鄧松盛鄧合伍于洽伍亞米吳俊德吳元德

黃保劉宗鄭子見林培鄧貴德鄧黃彩

楊伯貴劉羅發

同二月二十八日 賴養鄒德明馮永明李潤貴黃木張丁李六鍾木賢劉祥張福如

卓海李照許進鄭金許帝有

同四月十七日 陳南

同四月二十日 陳五和黎顯祥黃純李超吳桓卓海陳檻君戴貴李林簡永照蕭

義勝

同四月二十二日 程祖安劉森

同五月二日 梁譯施林輝陳帝常程道駱儘曹彩李靄雲林德珠何義黃俊陳

炳階程雨亭

同五月八日 伍雲生鄔秀胡廷張丁貴伍珍李綸黃秋曹維高葉金李杞侯艾

泉

同六月二日

上列各會員每人捐入會底銀五元，獨宋居仁則三元，共進會底銀二百八十八元。

又進鄧松盛股份銀三百元，進土人股份銀二百元，古岡股份銀一百元，鄭仲股份銀百元，容吉兆股份銀一百元，孫眉股份銀二百元，李多馬股份銀一百元。

進各會友會底銀二百八十八元 進各股份銀一千一百元

共進銀一千三百八十八元

支孫逸仙匯單通用銀二千元（五二算）支孫逸仙自帶一百元支附電信回上海電資二十元
○八毛

共支銀一千一百六十元○八毛 除支存銀二百二十七元二毛

一八九五年二月二十六日支宋居仁回唐亦脚銀二十五元

按上表所列姓名共為一百十二人。惟查其中有一八二名者，亦有二人同名者，且聞有直接交付 總理而不列表內者，以代遠年湮，無從考證。要之甲午檀島興中會會員人數實不滿一百三十人。至於所收會費及銀會股銀總數僅美金一千三百八十八元。此外尚有諸同志義捐一項，中以孫眉鄧松盛二人變產捐助為最鉅。聞 總理在行期以前綜合各款，所得僅美金六千餘元，仲香港幣約一萬三千元，而各會員中且有於數月後始交會費者，是可見當日籌措資金之不易矣。是歲十二月杪 總理歸抵香港，次年正月二十七日聯絡各方同志成立興中會總部，遂有乙未九月重陽日廣州之第一次革命。

(二) 興中會之復興與隆記報

癸卯年（民前九年）秋冬間，總理自日本至檀香山，該島原爲興中會發源地，親朋故舊爲數頗衆。惟是地黨務自經己亥年（民前十三年）冬，總理親函介紹梁啓超到此之後，會員投身保皇會籍者頗不乏人，正埠及小埠均設保皇會所，而興中會之名則久已不復掛人齒頰矣。事詳余著中華民國開國前革命史不贅。總理此度重來已相隔八載，大有今非昔比之感。時保皇會有機關名新中國報，其主筆爲康徒陳繼儼（號儀侃），聞總理之來，深恐保皇黨之基礎爲之動搖，乃於報上醜詆革命黨及總理個人。舊興中會員何寬鄭金李昌程蔚南許直巨林鑑泉等異常憤激。蔚南與總理本有戚誼，時在檀主辦一毫無宗旨之舊式報紙，名檀山新報，俗稱隆記報，總理遂使改組爲黨報，以筆政乏人，遂親自撰文與新中國報大開筆戰。就中以「駁保皇報」及「告同鄉書」二篇最爲透關。同時復致書橫濱自由，使代聘前中國報記者陳詩仲充任筆政。夏威夷各島僑胞自有此報鼓吹革命，耳目爲之一新，於是前之誤受康黨誘騙者紛紛脫黨，復黨，而新會員加盟者亦絡繹不絕，檀島新會員最得力者爲黃旭昇會長福等數十人。希爐埠（夏威夷羣島之一）新會員最得力者爲黎協毛文明黃振盧球李華根古賀劉安唐安黃義鄭鑿等數十人。兩埠同志先後延總理至西人各大戲院演講革命救國者極衆。總理此次在檀舉行興中會宣誓時，其盟書句語將興中會舊文添入「平均地權」四字，是爲興中會擴大誓辭之第一次。

迄是歲十二月，總理離檀渡美，檀山新報以所聘記者陳詩仲因駐香港美領事拒發入美護照，不克成行，遂改聘香山人張澤黎（孺伯）承乏，仍與保皇報繼續交戰，數載不止。

（三）民生日報

檀山新報既改組爲革命黨機關報，而停頓多年之興中會，亦因之復興。後三年（民前六年），社長程蔚南以年老力衰，向各同志提議，擬將報社轉讓別人集股接辦。於是會長福等，乃將該報從新改組爲日報，易名民生日報。社址設於斯密士街一零一六號，仍由張澤黎主持筆政，與新中國報新任記者梁文興（號秋水）繼續筆戰，劇烈不減於前。至丁未年（民前五年）秋，澤黎因事辭職他適，民生日報乃致函東京民報社，請總理推荐主筆。總理命前香港中國日報記者盧信（號信公）應之。信抵檀後數月，以編輯部發言權，時遭股東干涉，憤然辭職，擬即買舟離檀，會長福堅留之。盧謂必須另創一報，編輯人須有絕對之言論自由權，股東祇有供給經費之義務，而無過問言論之權利，伊始可取消東歸之意。長福從之，因即另行集資，授信以編輯全權創辦新報，即自由新報是也。是報以自由名，即表示名實相符之義。

（四）自由新報

盧信既創辦自由新報，籌備數月，於戊申年（民前四年）八月出版，報面所載編輯人盧按

功，卽盧信別號也。信自任社長，黃堃（號時初）爲司理，孫科爲譯員，曾長福、黃亮、譚達、梁海、楊廣達等爲董事。每星期一三五等日出版，是爲隔日報式。發刊後言論自由，不受股東拘束，因得高談革命排滿，無所顧忌。其創刊日所載發刊辭，駢四驪六，揭布宗旨，爲錄如後：

嗚呼，神州已矣，痛黃裔其長沉；奴隸甘乎？哀人心之盡死。昊天不弔，二百年憔悴誰憐？虜運未終，四百兆酣嬉若夢。問漢家宮闕，哭斷冬青。覩胡族衣冠，悲興胡黍。回觀大陸，盡是愁城。千重之毒霧重埋，半角之斜陽有限。新亭未坐，哭已失聲；故國瀕危，言其無罪。邇者人聯同志，結文字之因緣；報號自由，振天聲於海國。或者謂賈生痛哭，徒托空言；王郎悲歌，何裨實際？今者力唱民族，疾呼同魂。文主激而不平，鋒過剛而易折。志士舒投時之策，堅主民權；少年編革命之書，卽成黨獄。旗未張乎獨立，版曷出乎自由。不知七尺之軀尙存，方寸之心忍昧。文章寫恨，著作鳴愁。問天而首難搔，避地而身焉托。風沈雨晦，呼始祖其哀余；火熱水深，問同胞其何似？江南已矣，庾子山揮淚成文；薊北悽然，劉越石嘔心鍊句。以宣尼變魯之思，爲莊生悲越之吟。有託而成，無徵不到。發談言之公是，借題目以子虛。措詞則胸臆直舒，動聽則心脾漸泌。善乎白香山之體，以遠俗而彌精；江文通之詞，以移情而見誦。惟老嫗之可解，豈大雅之是嗤。縱非錦繡能工，要亦轆轤自運。而况萬流爲海，衆壑朝山。奇才多入彀中，異彩定騰海外。嗟乎，江山異色，撰述何心！怕

聞亡國之杜鵑，憐渠泣血；朝惱能言之鸚鵡，撩我傷情。誰鳴警世之鐘，獨樹登壇之幟。先乎言論，繼收實行。文字收功之日，還我山河；英雄應運之秋，蕩平醜虜。

自由新報出版後，大遭清領事梁國英及保皇黨徒之忌。以盧信所持入境護照爲教員憑證，而別任報館主筆，不在美國移民律祇准許中國官吏、商人、教員、學生、遊客五種人入境之列。遂朋比爲奸，同向檀埠移民局指摘，謂盧信依法不得在檀居留，應卽撥送出境，以免他人效尤。檀移民局徇其請，遽令信尅日離檀。會長福等大憤，立延律師向美京工商部抗爭，數月後，得工商部覆電，解釋移民律某條之意義，謂報館主筆亦屬教員之一類，應有居留美境之權利等語。於是盧信全獲勝訴，是爲中國報館主筆取得入美國境域權利之嚆矢。在盧信抗爭以前，中國記者固無一人可用本身職業之資格留美也。梁國英以所計不售，乃電請清政府通飭各省禁止自由新報入口，并威嚇該埠僑商，謂當行文粵督查抄自由新報股東原籍財產。致令該報股東之有身家在內地者，咸懷戒心。未幾，梁領事舉行華僑總註冊，張貼告示，謂每一僑民須繳納註冊費一元二角五分。自由新報斥爲非法敲詐，攻之甚力。於是全體華僑開大會於亞鴉喇公園，公推鄺良爲主席，決議驅逐梁國英出境，一致拒納僑民註冊費。梁國英因之氣餒，而其藉名斂財之計畫竟成水泡。此自由新報策動之力也。翌年己酉（民前三年），信復與孫科許棠等，發刊大聲雜誌，爲自由新報之助。又先後編印「自由言論」「人道」「革命真理」「揚州血淚」，四書行世，僑衆思想，愈形開發。及辛亥夏間，信偕黃堃返香港，溫雄飛代理筆政。

是秋武昌革命軍起，温亦歸國，由謝英伯吳榮新二人先後承乏。民國成立後，自由新報繼續支持三十餘年，至今猶屹然存在，然已改換報名矣。

(五) 興中會改組同盟會

同盟會東京本部成立後五年，檀香山興中會尚未改組爲同盟會，丁未年，盧信到檀主持黨報，曾兼奉開設同盟會之使命。以當時一部份同志僑商，鑒於往年駐檀清領事數次移文粵督查抄興中會員李昌等及保皇會員梁蔭南等原籍家產之前轍，有所戒懼，故未便大張旗鼓，從事改組。及庚戌（民前二年）三月，總理自美抵檀，盧信、會長福、梁海、黃堃、雷官進等，領黨員多人，迎迓於碼頭。數日後，諸同志開歡迎大會於荷梯厘街華人戲院，僑衆列席者千餘人，座無餘隙。總理宣佈是歲新正廣州新軍反正一役失敗之經過，謂全國軍人，多已趨向革命，如軍餉充足，即可隨時大舉。座衆聆言，咸爲鼓舞。旋召集興中會開會於自由新報樓上，令一律改寫盟書，補行同盟會入會手續，衆無異議。盟書上，誓辭爲「廢滅韃虜清朝，創立中華民國，實行三民主義」之十八字，與是年正月舊金山組織同盟會之誓辭相同。是爲總理擴大乙巳同盟會盟誓意義之第二次。是日首次舉手加盟者，有會長福、梁海、雷觀進、許直臣、孫科、温雄飛、譚達、黃堃、許棠、程就、鄺良、林覺、古柏荃、盧冠等二十餘人。公推梁海爲會長，會長福爲司庫，盧信爲書記。繼以同志商人中，有不便公開入黨者，特另設同盟會祕

密團，使不致爲清領事所羅織構陷。復在鍾宇住宅開秘密會，列席者，有鍾宇、楊廣達、李烈、譚達、譚亮、黃亮、雷官進、盧信諸人，衆如式加盟後，由總理委任楊廣達爲團長，李烈爲司庫，盧信爲書記。譚達、雷官進、鍾宇、黃亮爲值理。其後茂宜及希爐兩島與中會，亦相繼改組爲同盟會。茂宜島加盟者，有鄧明三、陸遠、譚進、劉聘、譚貴福等。希爐島加盟者，有黎協、林弼南、李成功、劉安、李社銀、鄭功、袁僚、譚惠金、古鵬雲、古賀等。總理居檀兩月，旋東渡日本，瀕行語會長福等，謂旅檀華僑子弟日衆，應設學堂以教育之。故事後長福、盧信、楊廣達、李烈、黃亮、鍾宇、雷官進、譚達、楊著瓦、古柏荃等，遂聯絡埠中殷商趙錦、古今福、龍文照、許發、劉佛良、余楫、楊年、林業舉等，措資創辦華文學校。其中捐款最巨者，首推長福。是校至辛亥年夏秋間，始宣告開學。是歲四月，盧信歸香港，代聘謝英伯爲校長。及民國成立，仍續辦多年，成績卓異。民十七年，改名中山學校，紀念總理勦辦功勳。辛亥三月二十九廣州一役之前，檀埠同盟會亦接總理公函，令募款濟急，以乏專員前往督導，故收效甚微。結果，香港革命軍統籌部僅收到該埠捐款港幣三千元，尙不及會長福一人釀助華文學校之數，殊出總理意外。

三 日本之部

旅日華僑與革命黨發生關係始於民元前十八年甲午冬，至辛亥年冬民國成立從未間斷。華僑可大別爲工商界及留學生二種。此文專紀述工商界而及留學生。蓋留東學界實爲我國革命之主動分子，所發刊各種書報及創設各種革命團體，均於民國建立關係至巨，非專書不能盡之也。考旅日華僑之開國革命工作，祇限於橫濱一地，其他神戶大阪長崎東京等處，實一無貢獻。茲分別述之如下。

(一) 橫濱興中會

橫濱華僑在甲午冬 孫總理自檀島返香港過境時，已發生關係，蓋 總理於船泊橫濱期間，曾在舟中向歸國僑胞演講逐滿救國，爲該埠售物行商陳清所聞，陳以報告僑商馮鏡如馮紫珊譚發等，馮等卽派陳重登該輪，邀 總理登陸商談國事。 總理謂該船開行在即，不便登陸，授陳以興中會章程及討滿檄文一大束，令轉交馮等照章設立分會，且謂廣州不日起義，陳若有意參加，可到香港投效等語。馮等得陳歸報，遂召集少數同志爲組織之預備。乙未九月廣州之役既敗， 總理偕陳少白鄭士良二人亡命至橫濱，首訪鏡如於山下町五十三番文經活版

所。文經爲經營外國文具及印刷業之商店，馮氏開設三十餘年，在僑商中藉藉有名者也。孫馮相見，有同舊識，遂由鏡如約其弟紫珊及譚發（奮初）梁達卿黎炳垣（煥堉）趙明樂趙嶧琴溫遇貴等十餘人，在文經號二樓會商組織興中會事。衆舉鏡如爲會長，趙明樂爲司庫，趙嶧琴爲書記，紫珊炳垣譚發等爲幹事。半月後復設會所於山下町一百七十五番。繼續加入者尚有溫芬（炳臣）、鄭曉初、陳才、陳和、黃焯文、陳植垣、馮懋龍（後易名自由）等十餘人，以懋龍爲年最少，時僅十四歲耳。是時旅日華僑尙多目革命排滿爲大逆不道，故會員咸有戒心。每次開會通知書皆不欲假手於日本下女，概由小會員馮懋龍分別派送。冬十二月 總理決意遠遊美洲，擬向華僑籌集巨資，爲捲土重來之計。因向各同志商借五百元充旅費。詎各同志多以有心無力對。趙明樂且辭退司庫一職，鏡如紫珊兄弟二人乃合籌五百元以應之。總理乃以此款百元供少白斷髮改裝之需，另以百元給鄭士良，使回港收拾餘衆，以備再舉，然後隻身再渡檀島。迨 總理離東後數日，少白乃遷寓文經商店，佐鏡如編輯華英字典。已而各會員供給月費者漸少，鏡如少白等以經費無着，乃將會所取消。凡有會務均假文經商店二樓開會決之。越三年戊戌（民國前十四年）春，總理自歐洲東歸，時會員寥寥，黨勢毫無進展。先是丁酉（民國前十五年）秋間，僑商鄺汝磐馮鏡如等大集會於中華會館，建議設立學校，以教育華僑子弟，公請興中會推薦校長。陳少白特薦上海時務報主筆梁啓超任之。其後康有爲以啓超有事不能兼顧，改薦徐勤承乏，并代改校名曰大同學校。徐勤既至橫濱，日爲康黨培植勢力，所聘教員

皆屬康門徒侶，大都出身科舉，長於文學，其交際手段遠在革命黨之上。故自大同學校成立之後，與中會勢力漸衰退。會員中能宗旨一貫歷久不變者，寥寥十數人而已。

(二) 橫濱兩俱樂部

當橫濱與中會成立後之二三年，即乙未年冬至丁酉年止，華僑工商界有兩小俱樂部，與中會略有關係。一名三餘軒，乃商人馮鏡如、馮紫珊、盧桂園、黎炳垣、梁達卿等數人所組織，會員僅十餘人。孫總理、陳少白、楊衢雲等居東時，每晚恆至軒中聚談，或瀏覽書報，此為僑商團體中之比較開通者。丁酉年秋，橫濱華僑發起募款建立學校以教育子弟，即由三數人在三餘軒閒談中決定者也。一名修竹寄廬，會員數十人，多屬洋行書記職員。其主要人為梁麒麟（文經商店書記）、關谷聲（某洋行買辦）、溫芬（某洋行職員）、梁樹南（某英人飯店買辦）等，分子雖較複雜，但服務洋行者性多豪爽，放言高論，毫無拘束，故總理等尤樂與親暱。戊戌年春楊衢雲自南非抵日本。及總理從倫敦東歸，以衢雲於乙未九月廣州一役貽誤機要致敗，特約至某密所面責其罪，衢雲俯首無辭，當日所約會之某密所，即修竹寄廬也。其後梁麒麟等返粵，每過香港時，陳少白常招待之。

(三) 橫濱文經商店

文經商店又名文經活版所，開設於橫濱山下町五十三番地，專營外國文具及印刷事業，在乙未十月總理蒞日時已開設三十餘年。店爲廣東南海人馮鏡如所創立，鏡如誕生地在香港，故有英名曰 Kingsell，譯音曰經塞爾，此字實由鏡如之「鏡」字粵音轉變而成，在英文本無意義，惟分拆解之，則爲售王，似可解作出售帝王之義。外人過者見其門首高懸經塞爾公司之金字大招牌，引爲奇特，多注目視之。鏡如祖先在粵世業儒醫，至其父展揚，始之香港，改業懋遷，旋以結識太平天國駐港將士，回粵策動軍事，被清吏以「紅頭賊」罪案逮捕下南海縣獄年餘，卒瘐死獄中。鏡如自是抱恨終天，隻身東渡求活，生平疏財仗義，排難解紛，頗得僑衆信仰。甲午中日構畔，清廷喪師辱國。鏡如積憤填膺，毅然剪除髮辮以示決絕。時旅日華僑無去辦者，有之自鏡如始。故華僑咸以「無辮仔」稱之。是年冬總理自檀香山返國，船過橫濱時，向同舟華僑演講逐滿救國，鏡如據售物商陳清報告，即派陳轉請總理登陸共商國事。總理謂舟行在即，無暇赴會，即交陳與中會章程一大束，使馮等在日設會進行。乙未九月廣州一役失敗之後，總理亡命日本，首訪鏡如於文經商店，即以此爲因緣也。嗣興中分會成立。總理攜來宣傳品二種，一爲揚州十日記，未附史可法及多爾袞二人往還書札；一爲原君原臣篇，即黃梨洲著明夷待訪錄之選本，均由文經商店代印萬卷，分送海外各埠。及總理赴檀，陳少白乃移寓文經二樓，助鏡如編輯華英字典，卽三十年前盛行海內外之馮鏡如華英大字典是也。及戊戌年大同學校成立，鏡如爲協理，屢約總理、陳少白、楊衢雲、梁啓超、韓文舉、

徐勤諸人在文經二樓密商兩黨合作救國問題，頗具端倪。以康有爲從中作梗而止，鏡如每引爲憾事。辛丑年，留東學生沈翔雲、戢元丞、秦力山、馮自由、王寵惠等發刊國民報於東京。時日人對於留學界出版品取締頗嚴，故發起人欲得外商保護，藉免檢查。鏡如生長香港，掛名英商，故由馮自由商取乃父鏡如同意，卽以「經塞爾」名義登記爲國民報之編輯兼發行人。國民報爲留學界提倡革命之第一種刊物，文經商店更爲橫濱興中會之出生地，是皆不可以不紀，（馮自由按：文經商店亦爲筆者呱呱之出生地）。是店於甲辰年（民前八年）遭祝融之劫歇業。

（四）橫濱華僑學校

橫濱華僑所設大同學校自爲康梁黨徒包辦後，因專用粵語教授，及強逼耶穌教徒子弟向孔子像拜跪事，埠中三江幫商人及耶穌教徒羣起反對，遂有江浙派之郭外峯，耶穌教之趙明樂、趙嶧琴、李卓生、關國義，中和堂之翟美徒、楊少佳、廖翼朋，中立派之鮑偉昭、盧榮彬諸人，集資另創華僑學校，以爲之抗。總董爲華俄道勝銀行買辦郭外峯。而趙嶧琴、廖翼朋二人副之。是校成立於戊戌年（民國前十四年）秋冬間，前後所延教員有廖雲翔（卓菴）、楊計伯、桂廷鑾（少偉）、胡毅生、梁新武（博君）、陸靄雲諸人。雖非革命黨所組織，然其發起人及教員多與革命黨有直接間接之關係。橫濱華僑子弟不致全受保皇邪說所蠱惑者，賴有此耳。

(五) 中和堂

中和堂者，橫濱華僑工界所組織之小俱樂部也。地點設在山下町唐人街之一角二樓，最初並無名稱，形式簡陋頑固，彷彿一普通之海員來往棲宿所，即俗所謂行船館者。堂中設關羽神像，每值神誕及節令等日，會員恆大會歡飲，歌唱粵曲，鑼鼓喧天，徹夜不休。其創立時期遠在丙申丁酉間（民國前十五六年），與革命黨人初無何等關係。戊戌年（民前十四年）夏，興中會員尤列蒞日本。其人素以聯絡工界見長。遂設法與該團體主持人鮑唐、楊少佳、陳澤景等接近親暱。鮑等以尤善於辭令，頗禮重之。尤乃為該團體定名曰忠和堂，并使訂閱上海香港日報數份以開導之，是為中和堂立名之始。是年冬，橫濱華僑各界以康梁黨徒藉大同學校名義，侵佔中華會館公產，羣起反對，忠和堂亦為反對派有力團體之一。是時大同學校校長徐勤方大倡孔教，藉口該堂崇祀關羽，譏為迷信神權之下流社會。該堂中人尤為憤激，惟以內部缺乏文士，指導乏人，特請興中會員陳少白為顧問，代計畫興革事宜。少白謂忠和二字之意義，不如中和之切當，為易名曰中和堂，并使撤去關羽神像破除迷信，以便耶穌教徒之加入。眾欣然從之。未幾耶穌教徒翟美徒等十餘人次第加入該堂為會員。翟為德國某洋行書記，兼英文夜校教員，與少白為舊交。次年眾舉翟為會長，而堂務乃日漸進展，辛丑年（民國前十一年）春留日學界所設勵志會舉行陽曆元旦紀念，嘗延華僑團體及外國名人蒞會，到者有日本進步黨首

領犬養毅，菲律賓獨立軍代表彭西，及中和堂代表九列，翟美徒二人。是日曾拍照紀念，今尙有人保全此項照片也（按保全人即著者）。該堂自成立以迄民國初年，仍是一普通俱樂部性質，與同盟會及同盟會並無密切關係，不過堂內任事人與革命黨員時相接近，有賴於革命黨員之指導耳。民國二年及六年北京政府舉行華僑參議員之選舉，該堂乃用中和書報社名義，先後派夏重民爲選舉代表，其會員亦多列籍國民黨。至民十二年日本慘遭地震巨災，華僑財產損失過半，該堂自是一蹶不起。

（六）開智錄月刊

開智錄發刊於橫濱山下町清議報館內，一少數粵籍留學生所創之小型月刊也。其編輯人爲香山人鄭貫一，而馮斯樂馮懋龍二人佐之。鄭號自立，又號貫公。二馮，一號自強，一號自由。時人號稱三自。鄭初與湘籍留學生秦力山同任清議報編輯。以該報鼓吹保皇，流毒甚廣，乃思爲拔趙轍易漢職之計，特創開智錄，專發揮自由平等天賦人權之真理。復撰作歌謠戲曲諧談各門，引人入勝，對於保皇媚滿之奴行醜態，漸以嬉笑諷刺之文字出之。其發行及印刷機關即在清議報事務所。以是海外各埠凡有清議報之地，莫不有開智錄。僑胞以其文字淺顯，立論新奇，多歡迎之。此報出版於庚子（民國前十二年）夏秋間。翌年春清議報以迭受各地保皇黨責難，謂不當容許革命黨人在報社內印刷他報，遽解除鄭貫一編輯一職，而開智錄由是停版。孫總

理時在橫濱聞之，乃函荐貫一赴香港任中國報記者。

(七) 廣東獨立協會

廣東獨立協會爲留東粵籍學生馮斯樂、李自重、鄭貫一、王寵惠、馮自由、梁仲猷諸人所發起，時在辛丑年（民前九年）春。東西各國忽喧傳法國要求清廷勿將廣東割讓他國之說，內外粵僑爲之騷然。粵籍學生初在東京開會倡議反對清廷割讓國土，及自行宣告獨立。繼以橫濱粵僑人衆，乃移會議地所於橫濱。孫總理贊助此事頗力。僑界參加者二百餘人。每次開議之前，諸發起人恆至前田橋總理寓所商談進行方法。與中會員黎炳垣、溫炳臣、陳和等招待尤形殷勤。粵籍留日學生與與中會合作自此始。

(八) 橫濱支那亡國紀念會

壬寅（民前十年）三月留日志士章太炎、馮自由、秦力山、馮君武、周宏業、陳猶龍、朱菱溪等十人發起支那亡國二百四十二年紀念會於東京上野精養軒，定期於是月十九日明崇禎帝殉國日舉行，藉以喚起內外國人之民族觀感。其宣言書分派各地僑衆，異常興奮。孫總理梁啓超均致書章太炎，願署名爲贊成人，惟事前梁忽要求取消，謂因有某種障礙，一切心照等語。是晨留學生赴會者，有程家樞、汪榮寶等數百人，而上野公園各路口滿佈警察，如臨大

敵，宣告奉警視總監令，禁止支那人開會，不許通過。蒞會者以原因不明，多逡巡不退，後乃知爲日政府勉徇清公使蔡鈞請求，而有此舉。時孫總理偕與中會員數人亦自橫濱來會。及詢知被日警干涉情形，乃面約發起人章太炎等，至橫濱補行亡國紀念式。是日下午太炎及秦力山、朱菱溪、馮自由四人應約蒞會，同舉行紀念式於永樂酒樓，橫濱會員列席者六十餘人。總理主席，太炎宣讀紀念辭。是晚與中會仍在此樓公宴太炎等，凡八九桌，異常歡洽，總理倡言各敬章先生一杯，凡七十餘杯殆盡，太炎是夕竟醉不能歸東京云。永樂酒樓係人和洋服店主人陳植雲所開設，陳亦與中會員也。

(九)振華商店

癸卯年（民元前九年）夏秋間，總理自越南河內至日本橫濱。時有廣州博濟醫院舊同硯廖翼朋亦在其地營小商業。總理乃介紹之於香港文裕堂印刷公司，爲代理人，遂在山下町開一商店，名曰振華。總理及眷屬寄寓是店二樓。樓下則翼朋與江蘇人黃宗仰（號烏目山僧）居之。時馮自由兼任香港中國日報通信員，往還至密。上海蘇報案諸關係人陳範、陳擷芬、父女亦避地日本。此外留學生馬居武、劉成禺、程家楹、楊度、葉瀾、李自重、桂廷鑾、盧少岐、胡毅生、楊守仁、伍嘉杰、張菘雲、黎勇錫、雍浩、鄭憲成、李錫青、劉維燾、饒景華、郭健霄、盧牟泰、區金鈞及僑商黎炳垣、張果、郭外峯、陳才、日人宮崎寅藏、日野熊藏、小室健

次郎等常來往東京橫濱間，日訪總理，高談革命。未幾遂有東京青山革命軍事學校之組織。日野小室同任教職。李自重、胡毅生、黎勇錫等十四人均由總理介紹入學。興中會之創立軍事學校，此爲濫觴。是歲秋冬間總理旋有美洲之遊。馮自由、梁慕光、胡毅生等更在橫濱發起洪門三點會，以爲聯絡祕密會黨之樞紐，亦假振華商店爲聚盟所。是店於翌年春，以廖翼朋經理不善歇業。自後總理在日之通信乃委托橫濱海岸九番地法國郵船公司華經理黎炳垣任之，至東京民報社成立時爲止。及乙巳六月同盟會成立，橫濱始終未設分會，僅由同志黎炳垣、林清泉、梁慕光數人設一聯絡處而已。

四 越南暹羅之部

總理於庚子（民元前十二年）初蒞越南西貢，獲識僑商李竹癡、曾錫周、馬培生等。乙巳（民前七年）同盟會成立後，所經營粵桂滇三省軍事，即大得旅越僑商之助。壬寅（民元前十年）總理應越南法總督韜美之邀，赴河內參觀博覽會，復結識僑商黃隆生、楊壽彭、甄吉庭、吳梓生等組織輿中會，是爲越南華僑設立革命團體之濫觴。及乙巳年冬，西貢堤岸成立同盟會，明年河內海防等處繼之。至丁未戊申（民前四五年）兩年，欽廉鎮南關河口各地先後大舉，旅越僑工各界或募築餉精，或入伍從軍，捨身捐產，以參加實地工作者，大不乏人，實爲全球各地華僑所不及。茲次第縷述之。

（一）河內輿中會

壬寅年（民前十年）秋冬間，總理因與越南總督韜美有約，遂藉參觀是年大博覽會之機會，遄赴河內相見。時韜美適因公返國，預囑其祕書長哈德安善爲招待。總理居河內數月，嘗致書香港約陳少白往會。有洋服商黃隆生者，粵之台山人，平日喜讀香港中國日報，逢人必罵滿洲政府，一日總理入其店購取飾物，偶與攀談，歡若平生。旋知爲革黨領袖，堅求訂盟，并次第介紹楊壽彭、羅錫、曾克齊、甄吉庭、張免池等入黨。是爲越南創立輿中會之嚆

矢。以會員不多，未設會所。每次開會恆假河內保羅巴脫街二十號隆生公司爲之，三年後改組爲同盟會。

(二) 西貢堤岸同盟會

乙巳年冬，總理借黎仲實、胡毅生、鄧慕韓等自日本到越南西貢。該地法國銀行正副買辦會錫周、馬培生及僑商李竹癡等大爲歡迎。西貢爲法國商行林立之區，而華人商店及各大米絞則在附近之堤岸。故總理留西貢一二日，卽赴堤岸就華僑之歡迎會。該地閩粵商人李曉初、李卓峯、劉易初、黃景南、關唐、李亦愚、顏太恨、潘子東諸人招待優渥，卽日成立同盟分會，舉劉易初爲會長，李卓峯副之，卽以易初所設之美菽街三〇四號昌記行爲通信機關。自後西貢堤岸兩埠同志對於粵桂滇三省革命軍事，均先後醴助巨款，爲他處僑商所不及。就中以會錫周、馬培生、李卓峯所捐爲最巨。總理到西貢數次，錫周培生等有求輒應，毫無吝色。黃景南開設賣豆芽小店，市人稱之曰牙菜祥，每日恆以所得投入撲滿中，貯爲捐助革命之需，時人聞而義之。丙午年秋香港中國日報改組，李亦愚、潘子東、顏太恨等合認新股三千餘元。中國日報大得其助。

(三) 河內海防同盟會

在南洋各埠華僑之中，與革命工作有直接關係者，以越南河內海防二處爲首屈一指。蓋其地與粵桂滇三省邊界接壤，總理與黃克強、胡漢民、王和順、黃明堂、關人甫諸人經營三省軍事，均假道越邊爲出發點也。總理於壬寅年參觀河內大博覽會時，已與當地華商楊壽彭、黃隆生、甄吉廷、張免池、吳梓生等共設立興中分會。及丁未年春，總理爲策動三省軍事起見，駐節河內，設機關部於甘必達街六十一號，即將興中會改組爲同盟會。先後加盟者有楊壽彭、黃隆生、吳梓生、張免池、甄吉廷、王和順、黃明堂、關人甫、曾克齊、羅錚、李福林、譚義、黎廣、李菱、李祐卿、劉岐山、甄璧、梁秋、高德亮、麥香泉、何海榮、饒章甫、李應生、張邦翰、盧仲琳、張翼樞、林煥廷、陳耿夫、彭俊生、黎量餘、劉梅卿、梁建葵、梁瑞廷、陳二華、梁恩等數百人。海防分會設於台灣街三十二號萬新樓，以劉岐山爲會長，甄璧、林煥廷、陳耿夫等爲幹事。其地鄰接粵省欽州防城縣東興鎮，總理及黃克強、王和順於丁戊兩年經營欽廉各地軍事，卽由海防就近發動及配備一切。戊申年二月黃克強率衆由越邊進攻欽州所需之彈藥，係由香港馮自由購辦，托河內輪船買辦彭俊生及于愛輪船買辦黎量餘二人密運至海防，交劉岐山接收。岐山招待往來同志，異常周到，時人以小孟嘗稱之。張免池任河內廣東會館書記多年，生平有寫信癖，凡海外有同盟會之處，莫不寄書通報消息，時任香港中國日報之義務訪員。丁未十月鎮南關及戊申三月河口之二役，總理迭向當地法國商行購入盒子砲及手鎗多具，以餉糈不足，多由楊壽彭、梁秋等負責保證，限期償還債款。黃隆生於河口之

役，因運輸米糧供應前方，致爲法政府遣送出境。此外楊壽彭、劉岐山、甄吉廷、麥香泉、高德亮、饒章甫、陳二華、梁恩諸人，或輸送武器，或接濟糧食，或籌措經費，或參加義師，均被陸續驅逐離越，轉赴香港。自戊申四月以後，同盟會籍之僑商，因有參加革命軍之嫌疑而被下令驅逐，不得已犧牲商業者十餘人，損失財產，實屬不貲。各埠黨員直接對於革命之貢獻，不得不首推河內海防二地矣。

(四) 暹羅華暹日報及同盟會

華暹日報設於暹羅國京城檳角埠生日橋側五十三號，爲蕭佛成、陳景華、沈荇思等所創辦。先是香山人陳景華任職廣西貴縣知縣，因得罪粵督岑春萱，亡命暹羅，旋與老華僑蕭佛成等發刊此報，內容分中國暹羅二種文字，暹文部份由佛成及其女公子任之。出版一載，漸主張革命，於乙巳年冬與香港中國日報互通聲氣，并托中國報代聘主筆，中國報乃推荐前有所謂報記者王斧及前閩南報記者康蔭田二人應之。僑商之同情革命者，有王杏洲、陳美堂、何少禧、陳載之、朱廣利、馬興順、梁挺英諸人，皆該地商界中之名望素著者。戊申年（民國前四年）冬，總理偕胡漢民、胡毅生、何克夫、盧仲琳等自新加坡抵暹，僑商開會歡迎於中華會館，列席者數百人。越日暹政府即來干涉，限總理於一星期內離境，并不許談及政治問題。駐暹美國公使聞之，以總理爲檀香山籍公民，特向暹政府提出抗議，因得延期一星期。於是總理

不便再赴會演說，惟秘密組織同盟分會。華僑入會者頗不乏人。衆舉蕭佛成爲會長，陳景華爲書記，沈荇思爲會計。總理居暹十日，仍返新加坡，留胡毅生、盧仲琳二人助理華暹報筆政。己酉（民國前三年）春，馬興順因事返潮州原籍，旅暹保皇黨人以馬爲華暹報大股東，特致電粵督，控以附逆黨惡罪名。清吏因是將馬逮捕繫獄。陳景華受暹同志之托，特回香港設法營救，卒賴粵紳江孔殷代爲斡旋，保釋出獄。馬於開釋後未久，以在囚備受虐待，得病逝世。

五 美國之部

旅美華僑與革命黨發生關係，始於民元前十六年丙申，時總理於乙未廣州失敗後即赴檀香山計畫再舉，是夏第一次西遊新大陸，居舊金山月餘。以其時華僑風氣未開，無從發展，附和革命真理者僅得耶教徒鄺華泰博士等數人。及癸卯年（民元前九年）冬第二次渡美，適洪門致公堂發刊大同日報為反清復明之喉舌，民智日開，僑胞漸覺悟保皇邪說之非。總理由是得以奠定旅美國人革命團體之基礎，為庚戌辛亥兩年（民元前一二年）募集起義基金之導線，故已酉（民元前三年）冬第三次渡美，雖僅籌得香港銀八千元，供廣州新軍反正之需，然美國東西兩部之同盟會即成立於是時，於三民主義之宣傳，實具有長足之進步。辛亥春夏間，總理復由南洋第四次渡美，是秋聯絡致公堂及同盟會合組洪門籌餉局，以充辛亥革命各省義師之餉源。不及數月，鄂省革命軍猝然大舉，共和政府於以建立，是則旅美華僑對於開國革命之貢獻，固不在南洋華僑之下也。茲分別縷述如下。

（一）美洲洪門致公堂

致公堂者，美洲洪門三合會之通稱也。洪門即天地會，三合哥老兩會皆其支派。三合會又

稱三點會，在海外或稱洪順堂及義興會。在美洲則別稱致公堂。是會始創於清初康熙時代，其時距明亡未久，明之忠臣烈士再三力圖匡復，前仆後繼，卒難挽回世運。二三遺老以清祚已固，興復大業非一時所能收效，乃創設一種秘密團體，專傳播種族思想及亡國歷史於下層社會，以爲民族復興之種子。其宗旨曰反清復明，特製各種口語暗號，以保守秘密，是卽洪門團體所由起也。清季海禁漸開，粵中三合會員因避清吏摧殘，相繼避跡美洲，遂組織致公堂以資聯絡。其後太平天國失敗，洪秀全、陳金剛諸部將亦跟踪而至，而勢力乃日興盛，在舊金山者號稱致公總堂。分堂遍設各埠，凡有華僑足跡者莫不有之，殆佔旅美華僑全部人數十之七八。惟以代遠年湮，故老凋謝，漸失却本來面目。其會員能了解原有宗旨，百不得一。故戊戌（一八九七）清室政變後，康有爲梁啟超先後遊美，發起保救大清光緒皇帝會，洪門人士列籍其中者，頗不乏人。康徒歐榘甲、徐勤、梁啟田等且投身致公堂以利用之。總理於乙未廣州失敗之翌年丙申（一八九六）初次遊美，嘗向洪門人士多方遊說，動以大義，致公堂會員向視會外人士爲風仔（卽奸細之稱），以總理時未列籍洪門，竟視同陌路，無助之者。及癸卯（一九〇三）冬，總理爲聯絡同志厚植勢力計，在檀香山毅然加入致公堂，已而重遊北美，爲清領事及保皇黨勾結移民局職員妨害登陸，困於碼頭木屋者多日。事爲舊金山致公總堂大佬（首領之稱）黃三德，書記唐瓊昌所聞，乃代延美律師那文向華盛頓工商部抗爭，卒獲勝訴，得以安然入境。是爲總理與美洲致公總堂發生關係之嚆矢。時總理以洪門人數雖衆，而團體異常散

漫，不能爲祖國之助，乃建議舉行洪門會員總註冊之法，并代撰致公堂新章規程八十條，總堂諸幹事咸贊成之。旋推舉總理及黃三德二人遊埠鼓吹總註冊之利益，預計全美會員總數約七八萬人，若註冊有效，可得美金二十萬元以上。惟是時各分堂對於總堂向少聯絡，團體日渙，威信漸失，加以各埠洪門重要職員多染康梁餘毒，渾忘却反清復明之本來面目，總理雖苦心孤詣，舌敝唇焦，而各分堂大都陽奉陰違，延不舉辦。總理以奔走數月，收效甚少，遂委其事於黃三德，而有歐洲之行。然總理此度遊美，對於洪門總註冊之計劃雖無若何成績，惟改組康徒歐築甲所蟠據之大同日報爲革命黨報一事，實予洪門人士以長足之進步。後數年加拿大致公堂之變產助餉，及辛亥洪門籌餉局之成立，卽種因於是，厥功偉焉。茲錄總理所手訂致公堂新章規程八十條如左。

致公堂重訂新章要義

原夫致公堂之設，由來已久，本愛國保種之心，立興漢復仇之志，聯盟結義，聲應氣求，民族主義賴之而昌，祕密社會因之日盛，早已遍布於十八省與及五洲各國，凡華人所到之地，莫不有之，而尤以美國爲隆盛，蓋居於平等自由之域，共和民政之邦，結會聯盟，皆無所禁，此洪門之發達，固其宜矣。惟是向章太舊，每多不合時宜，維持乏人，間有未愜衆意，故有散漫四方，未能聯絡一氣，以成一極強極大之團體，誠爲憾事。近且有背盟負義，趨入歧途，倒戈相向者，則更爲痛恨也。若不亟圖振作，發奮有爲，則洪門大義必將淪墮

矣，有心人憂之，於是謀議改良，力圖進步，重訂新章，選舉賢能，以整頓堂務，而維繫人心。夫力分則弱，力合則強，衆志可以成城，此合羣團體之可貴也。我堂同人之美國者，不下數萬餘人，向以散居各埠，人自爲謀，無所統一。故在平時則消息少通，有事則呼應不靈，以此之故，爲外人所輕藐所欺陵者，所在多有，此改良章程維持堂務所宜急也。且同人之旅居是邦，或工或商，各執其業，本可相安無事，但常以異鄉作客，人地生疎，言語不通，風俗不同，入國不知其禁，無心而偶干法紀者有之矣。又或天災橫禍，疾病頗連，無朋友親屬之可依，而流離失所者，亦有之矣。其餘種種意外危虞，筆難盡述。語有之曰：「人無千日好，花無百日紅。」若無同志來相維護，以相調恤，一旦遇事，孤掌難鳴，束手無策，此時此境，情何以堪！此聯合大羣，團集大力，以捍禦禍害，調恤同人，實爲本堂義務之不可缺者一也。本堂人數既爲美洲華人社會之冠，則本堂之功業，亦當駕於羣衆，方足副本堂之名譽也。乃向皆泄泄沓沓，無大可爲，此又何也？以徒有可爲之資，而未有可爲之法，故雖欲振作而無由也。今幸遇愛國志士孫逸仙先生來遊美洲，本堂請同黃三德大佬往遊各埠，演說洪門宗旨，發揮中國時事。各埠同人始如大夢初覺，因知中國前途，吾黨實有其責。先生更代訂立章程，指示辦法，以爲津導，我旅美同人可以乘時而興矣。况當今爲爭競生存之時代，天下列強高倡帝國主義，莫不可以開疆闢土爲心，五洲土地已盡爲白種所併吞，今所存者，僅亞東之日本與清國耳。而清國則世人已目之爲病夫矣，其國勢積弱，疆宇

日蹙。今滿洲爲其祖宗發祥之地，陵寢所在之鄉，猶不能自保，而謂其能長有我中國乎？此必無之理也。我漢族四萬萬人，豈甘長受滿人之羈轆乎？今之時代，不競爭則無以生存，此安南印度之所以滅也。惟競爭獨立，此美國日本之所以興也。當此清運已終之時，正漢人光復之候。近來各省風潮日漲，革命志士日多，則天意人心之所向，吾黨以順天行道爲念，今當應時而作，不可失此千載一時之機也。此聯合大羣，圍集大力，以圖光復祖國、拯救同胞，實爲本堂義務之不可缺者二也。中國之見滅於滿清，二百六十餘年，而莫能恢復者，初非滿人能滅之能有之也。因有漢奸以作虎俵，殘同胞而媚異種，始有吳三桂、洪承疇以作俑，繼有曾國藩、左宗棠以爲厲，今又有所謂倡維新談立憲之漢奸，以推波助瀾，專尊滿人而抑漢族，假公濟私，騙財肥己，官爵也，銀行也，鐵路也，礦務也，商務也，學堂也，皆所以餌人之具，自欺欺人者也。本堂洞悉其隱，不肯附和，遂大觸彼黨之忌。今值本堂舉行聯絡之初，彼便百端譏謗，含血噴人，蓋恐本堂聯絡一成，則彼黨自然瓦解，而其所奉爲君父之滿賊，亦必然覆滅，則彼漢奸滿奴之職，無主可供也。其喪心病狂，罪大惡極，可勝誅哉。凡吾漢族同胞，非食其肉，寢其皮，何以伸此公憤，而挫茲敗類也。本堂雖疲篤，亦必當仁不讓，不使此謬種流傳，遺害於漢族也。此聯合大羣，圍集大力，以先清內奸而後除異種，實爲本堂義務之不可缺者三也。今特聯絡團體，舉行新章，必當先行註冊，統計本堂人數之多少，以便公舉人員，接理堂務，必註冊者然後有公舉之權，有應享之利，此乃本堂苦心爲大

衆謀公益起見，法至良，意至美。凡我同人，幸勿爲謠言所惑，遲疑觀望，自失其權利可也。今特將重訂新章，先行刊布，俾各埠週知參酌妥善，待至註冊告竣之日，然後隨各埠公舉議員，擇期在本大埠會議，決奪施行，望各埠堂友同心協力，踴躍向前，以成此舉，同人幸甚，漢人幸甚。

謹將重訂新章條款詳列呈覽

第一章 綱領

一、本堂名曰致公堂總堂，設在金山大埠，支堂分設各埠，前有名目不同者，今概改正，名曰致公堂，以昭劃一。

二、本堂以驅除韃虜，恢復中華，創立民國，平均地權爲宗旨。

三、本堂以協力助成祖國同志施行宗旨爲目的。

四、凡國人所立各會黨，其宗旨與本堂相同者，本堂當認作益友，互相提攜，其宗旨與本堂相反者，本堂當視爲公敵，不得附和。

五、凡各埠堂友須一律註冊報告於大埠總堂，方能享受總堂一切之權利。

六、凡新進堂友須遵守洪門香主陳近南遺訓，行禮入關。

七、所有堂友無論新舊，其有才德出衆者，皆能受衆公舉，以當本堂各職。

八、本堂公舉總理一名，協理一名，管銀一名，核數一名，議員若干名（以上百人公舉

一名)。

九、本堂設立華文書記若干名，西文書記若干名，委員若干名，幹事若干名。以上各人，皆由總理委任，悉歸總理節制。

十、本堂設立公正判事員三名，公正陪審員二十名，皆由總理委任，但不受總理節制。

十一、總理協理以四年爲一任，管銀核數一年爲一任，議員由初舉時執籌，分作三班：第一班一年爲一任，滿期照數選人補充，或再舉留任。第二班兩年爲一任，滿期選補。第三班三年爲一任，滿期補充。如是議員之中常有三分之二爲熟手之人。

十二、判事員爲長久之任，若非失職及自行告退，不能易人。判事陪員分兩班，第一年爲一任，任滿由總理擇人充補，第二班兩年爲一任，滿期擇人充補如之。

十三、各埠支堂堂當舉總理一名，書記一名，管銀一名，核數一名，值理若干名，皆由堂友公舉，呈名於總堂總理批准，方能任事。如所舉非人，總理有權廢之，堂友當另行再舉安人。

十四、各埠支堂堂友可隨地所宜議立專規，以維持堂務，然必當先呈總堂議員鑒定，總理批准，方得施行。

十五、各埠新立香主，必經總堂議員議決，總理批准，方能領牌受職。該埠叔父職員等

必先查明該新香主品行端正，堪爲表率者，方可聯保。至領牌受職之後，凡放新丁一名，須繳回本堂底票銀二元。如未經議准領牌，竟欲開棧，該處叔父職員等切勿徇庇，并帶新丁入關，如有不守堂規，或不領牌，或不繳交底銀，一經查出，定將名號革除，并追回票牌等件。

十六、凡公舉人員之期，皆以每年新正爲定。

十七、議員議事必要人數若干，方爲足額，乃能決事。（下略）

（二）舊金山與中會

美洲各地向無與中會之組織。癸卯年（民國前十年）十二月下旬，總理自檀島乘高麗輪船抵舊金山，爲保皇會員勾結移民局員從中作梗，被困於碼頭木屋者多日。賴當地中西日報社長，耶穌教友伍盤照之助，與致公堂職員黃三德、唐瓊昌合力營救，并向華盛頓工商部依法抗爭，始獲安然入境。既脫難，卽下榻於致公堂會所，日間則傳食於中西日報，與教友伍盤照、伍于衍、司徒南達、鄺華汰、鄧幹隆諸人至爲相得。以旅美僑胞多染康梁餘毒，遂托中西日報印刷鄒容著革命軍一萬一千冊，分贈全美僑衆，以廣宣傳。同時更欲藉此開設與中分會，擬先從具有新思想之教友入手。於是召集耶穌教徒之有志者，假當地士作頓街長老會正道會所開與中會救國籌餉大會，蒞會者頗衆，公推鄺華汰博士爲主席。鄺爲有名學者，娶美婦爲室，時

任加省大學教授，對於總理主張，異常傾倒。是日總理演講革命救國真理後，提議請座衆購買革命軍需債券，謂此券規定實收美金十元，俟革命成功之日，憑券即還本息一百元，凡購券者即爲興中會當然會員，成功後可享受國家各項優先利權云云。各教友對於購券事均甚贊成。惟聞凡購券者即爲興中會員一節，多談虎色變，謂吾輩各有身家在內地，助款則可，入會則不必。總理乃宣稱此舉志在籌餉，入會與否，一惟尊便。此項債券票面並不填寫姓名，可勿過慮。衆無異言，於是各教友先後購券得美金四千餘元。總理後借黃三德周遊美國各地鼓吹洪門會員總註冊，即特此款爲旅途之需。總理初意原欲在美奠立興中會基礎，惟結果所得，正式宣誓入會者祇有鄺華汰等數人。當時聞教青年有志入會者，原非少數，徒以司徒南達牧師危辭聳聽，致有志者稍形猶豫，而總理爲籌餉起見，遂不強之云。華汰於翌年歸香港，就李陞格致學院校長之聘，旋得病身故。

(三) 舊金山大同日報

舊金山大同日報爲美洲致公總堂原始之機關報。設於舊金山士坡福街，在辛丑年（一九〇一）出版。其創辦人爲康有爲弟子歐築甲。歐字雲樵，廣東歸善人，在康門中以能文稱。己亥年任橫濱清議報主筆。時梁啟超有脫離康有爲而與總理聯合組黨之議，歐亦熱心贊同之一人。旋因康有爲嚴令制止，事遂不成。歐被派赴美主持保皇會之文興日報。以昔年居鄉時嘗入三合

會，故與致公堂中人往還漸密。已而遊說堂中書記唐瓊昌，組織大同日報，以爲駐美洪門機關。該堂幹事成遂其議。發刊時瓊昌任經理及譯員，歐任總主筆。旋以太平洋客名義，高唱廣東宜脫離滿清，宣布獨立之說，凡四五萬言，大博僑衆歡迎，其後由橫濱清議報彙編出版，即新廣東一書是也。癸卯冬，總理蒞檀香山時，嘗與新中國報記者康徒陳繼儼爲革命保皇問題大開筆戰，歐爲援應同門起見，竟於總理入美境時肆意攻擊，謂洪門人士不應爲革命黨所愚弄，致公堂大佬黃三德及該報唐瓊昌初勸歐與總理合作，歐堅不從，遂下逐客令，擯之於門外。暫由總理代理筆政。卽函托馮自由於留日學界中物色主筆。馮初推荐桂人馬君武，馮以事辭，乃改聘鄂人劉成禺。劉於甲辰年（一九〇四）春夏間抵美，而大同報之陣容爲之一新。自是全美僑衆之革命思潮，遂因大同報之崇論宏議而一躍千丈，不獨洪門人士爲然也。辛亥七八月間，馮自由爲籌募軍餉事自加拿大至舊金山。大同報更延充記者一席。及鄂省革命軍起，馮劉二人先後歸國服務共和政府，民二年北京政府舉行參議院華僑參議員選舉，唐瓊昌代表旅美華僑總商會回國，以國民黨之助，膺選爲參議員。大同報於民元改稱中華民國公報，民三仍復名大同報，後數年停刊。

（四）美國同盟會

美國同盟會之動機 在己酉年（民國前三年）冬季以前，美洲各地尙無同盟會之組織。甲

辰年（民前八年）春，孫總理嘗周遊美國東南西諸埠，聯絡洪門致公堂會友，鼓吹洪門總註冊事。但以其時華僑風氣尙極閉塞，保皇會機關林立各處，雖奔走幾年，僅能改組舊金山洪門機關之大同日報爲革命宣傳樞紐，一新全美華僑之耳目而已。乙巳（民前七年）同盟會成立後五六年，東京本部屢欲遣派黨員赴美開設分會，以限於美國移民律，不易領取入境護照而止。丁未（民前五年）冬生長美國之香港同盟會員李是男，因事返舊金山，香港同盟分會長馮自由授以收攬同志之委任證書，使在美擴張黨務。李在美數載，以環境不佳，未便進行，至己酉夏秋間，始聯絡有志者溫雄飛、黃芸蘇、黃傑廷、黃伯耀、許炯藜數人組織少年學社，爲進行之預備，暫以黃伯耀所設之永生殯儀館爲通信處。又同年有美東紐約埠華僑青年署名哀崖狂士者，向香港中國日報投函購報，馮自由覆函謂既名哀崖，必是熱心革命排滿，請以真姓名見告，以便介紹入黨。此人自稱名趙公璧，極願加入革命黨，馮乃爲作介函，使於總理抵美時持之往見。以上所述李是男、趙公璧二人，即後來美西美東同盟會之主動人也。

美東美中之同盟會 己酉春，總理以歷年經營粵桂滇三省軍事相繼失敗，南洋同志籌餉之力漸告枯竭，決計遠遊歐美，另闢財源，以謀再舉。是歲四月自南洋渡歐洲，九月杪由歐抵美東紐約。時有致公堂老友黃溪記親至碼頭接待。黃號佩泉，有商店在巴也街七十二號，其店即以溪記名之。趙公璧持馮自由介函請謁，并介紹同志陳永惠等數人，即日成立美東同盟會。第一次加盟者有黃溪記、趙公璧、鍾性初、陳永惠、吳朝晉、唐麟經、吳贊等七人。數日後忽

接黃克強、胡漢民、馮自由等自香港來電，稱廣州新軍經已運動成熟，有港幣二萬元即可發動，煩速接濟等語。總理得電，立覆電黃等，謂兩月內決可電匯二萬元，令即進行，并囑各同志設法籌措。時分會甫告成立，能力有限，連致公堂書記雷月池、伍洪賞等所募之款，僅匯香港中國報第一次款港幣三千元而已。總理於是就近往波士頓埠謁致公堂大佬（首領之稱）梅宗炯求助，梅素熱心革命，即向各會友募捐，得港幣二千元，亦電匯香港中國報收。十月初八日，總理由紐約赴美東芝加哥，時有耶教牧師蕭雨滋父子，夙具革命思想，聞總理之來，預約同志多人恭迓於車站，并開歡迎宴會於聚英樓。總理即席演講革命真理及其趨勢，聽者莫不傾心。同時提議設立同盟分會，第一次加盟者有蕭雨滋、蕭漢衛、梅培曹、湯三、羅冲輝、程天斗、梅喬林、李雄、梅天宇、梅賜璧、梅友夥、梅彬等十餘人，譚贊、伍頌唐、何寶衡、梅壽、林光漢等數十人繼之，即以梅壽所設之泰和店爲通信處。總理更向諸會員募款應廣州之急，居芝城月餘，得捐款港幣三千元，亦匯香港中國報轉陳同收，陳同即胡漢民之改名也。是地之致公堂主事人梅宗周爲美中鉅商，時兼任保皇會會長，故無所助。總理以兩月來在紐約，波士頓、芝加哥三處所籌義款，總數僅得港幣八千元，去原定二萬之額尚遠，遂於十二月十三日首途赴美東繼續募捐。

舊金山募餉之困難 總理前讀美國軍事學家堪馬利(Hornorey)所著美日未來太平洋戰爭論而善之。嘗與堪氏通信數次。故於此次于役美西途中，在洛杉磯下車，訪堪氏於其村居，

暢談一日，始向舊金山進發。是月二十八日下午車到，李是男率少年學社同志數人歡迎於車站。下車後在唐人埠之克利街粵東旅館下榻。時少年學社祇有社員十餘人，全屬僑校教員及工界分子。總理語以亟須籌餉接濟廣州新軍事，僉以有心無力對，總理乃親訪洪門致公總堂大佬黃三德及大同日報社長唐瓊昌求助。致公堂於甲辰（民前八年）春，總理登陸美境時，曾出大力援助出險，惟對於國內起兵反清諸役，向無供應情事，祇有美國南部巴士杰埠一小致公堂，嘗於戊申年（民前四年）春捐助革命軍資港幣八百元，匯寄中國報而已。黃三德聞總理報告軍事後，即向堂內各值理籌商，咸謂籌餉事大，非短期內所能解決。正商談間，而廣州新軍倉卒舉事失敗，倪映典戰死之港電傳至。總理及諸同志聞之，異常悼惜，即由李是男向其父祐寬所設之和隆皮鞋店假借美金數百元，匯香港中國報收港幣一千元，為義師善後之需。統計總理此行遊美，四次匯款總數為港幣九千元，皆由中國報代收轉交南方支部，是可見當年募集革命資金之不易矣。

美西同盟會 總理鑒於是役籌餉之困難，益覺成立革命團體之必要。遂令李是男等改組少年學社為同盟會，正月十八日宣告成立。總理親為主盟人，初次宣誓入會者，有李是男、黃芸蘇、黃伯燾、許炯葵、趙煜、劉漢華、黃傑亭、李旺、劉達朝、黃經申、伍進、龐輝、李梓青、崔通約、王和彩、胡祖張、張靄蘊、楊漢魂等十餘人，總理此次在美組織同盟會最關重要者，為擴大同盟會誓辭及改用會名一事。以前為「驅除韃虜，恢復中華，創立民國，平均地

權」之十六字，今則易爲「廢滅黷廢清朝，創立中華民國，實行三民主義」之十八字。又將盟書內「中國同盟會會員」亦易爲「中華革命黨黨員」。然對外對內仍令照舊通用同盟會名義如故。是爲總理是次遊美之創舉。東京本部及關內外各地分會均未接到通告，僅於是年秋，總理歸抵檳榔嶼時，南洋支部亦奉令照行耳。舊金山同盟會既成立，名稱爲美國總支部，全美各分會均由支部統轄，黨勢日見興盛，各埠僑衆陸續加入者，復有黃超五、雷祝三、林朝漢、鄺林（佐治）、朱卓文、黃富、盧維溥、李七、劉光華、周長五、陳樹華、司徒介臣、鄺占南、馬長興、斐顯裔、呂寧、伍平一、劉鞠可、朱本五、余森郎、劉廣華、簡振興、歐漢英、梁日東、劉日初、鄭超羣、陳耀、甄春年、雷蘇泉、黃晉三、何利、李伯眉、鄭廣池、劉博文、周文培、梁夢熊、鄺灼、高廷棟、劉毅生、伍蕙泉、陳披荆、譚南、劉恢漢、朱漢鏗、張漢旅等數百人。總理以在美黨部基礎已臻鞏固，遂於是春三月取道赴檀香山。

（五）舊金山少年中國報

當庚戌年春，李是男與溫雄飛、黃芸蘇、黃伯耀等數人組織少年學社後數月，曾用油印出版一種刊物，名曰少年，由是男雄飛芸蘇等撰述小品文字，類多提倡革命攻擊清政之作，附以粵曲歌謠，均出是男手筆，甚爲讀者稱賞。及是歲四月杪，總理抵舊金山，是男等奉命改組少年學社爲同盟會，自是黨員日衆，分會遍於各埠。遂更收集股金，將少年週刊擴大爲少年中國

晨報，籌備數月，於是秋在唐人埠克利街出版，是爲全美同盟會機關報之第一家。在美各華文報紙通例，於每日正午發刊，獨少年報於每晨印就派送，亦爲各報之創例。初期任經理者爲陳樹華、司徒介臣二人，任撰述者爲黃超五、黃芸蘇、崔通約、張靄蘊諸人，任翻譯者爲黃伯耀一人，李是男則專任副刊編輯。出世後，高談革命排滿，風行一時，華僑頑固者流多以「少年亡」三字詆之。諸記者中有崔通約者，原屬康有爲弟子，亦耶穌教徒，曾任香港世界公益報編輯，性情反覆，生有惡癖，到處爲人擯棄。辛亥五月以向總理貸資不得，竟假手少年報登載譏刺詩詞，有「生平不喜因人熱，恥向黨報瞎捧場，領袖何時生我士，國亡種滅倍心傷」之句，各會員讀之大嘩，遂由同盟會公議逐之於門外。同盟會對於犯法黨員，重者判處死刑，並無擯逐之例，有之自崔通約始。少年報於民國成立後，報務隨黨務而蒸蒸日上。以營業順利，獲利甚豐，置有大廈一所，及今猶屹然存在，爲清季革命黨機關報之惟一壽命最長者。

(六) 洪門籌餉局

辛亥五月 總理於漫遊加拿大及美東各地後，重遊金門，有鑒於同盟會與致公堂不能合作之弊，欲使同盟會員一律加入致公堂，以泯除雙方畛域意見，庶可共同籌餉救國。李是男等多以致公堂入關（洪門稱入黨曰入關）儀式鄙俚，手續繁重爲辭，各有難色。總理謂可使之刪繁就簡，斟酌改良。於是數訪致公堂重要職員黃三德、唐瓊昌等，磋商合作方法，議定由致公

堂開特別會，刪除一切繁文縟禮，以優待同盟會員之入關。而同盟會員則遵 總理命令全體受盟，以表示合作誠意。黃唐等咸熱心贊成。遂由雙方各在大同日報及少年中國晨報揭載聯合布告，茲錄二項布告如左。

同盟會與致公堂聯合布告：洪門爲中國提倡排滿革命之元祖，而人稱致公總堂之改良新章，更與本會三民主義相合，原可互相提攜，共圖進取。惟洪門內含有祕密性質，而本會會員尙多未入洪門者，故不免窒礙。今得 孫總理駕抵金山，主張聯合。而致公總堂開特別會，以招納本會會員之未加入洪門者。本會集議全體贊成，特此布告各埠會員一體遵照，以成大羣，合大力，而共圖光復之大業，是爲厚望。天運辛亥年五月二十二日，三藩市中國同盟會啓。

致公總堂布告：孫文大哥痛祖國沈淪，抱革命真理，遍遊五洲，駕抵金門，與衆義兄聚集，倡議與同盟會聯合，結大團體，匡扶革命事業。同盟會員熱心祖國，全體公議，其未進洪門者一律入關，聯成一氣。本總堂叔父大佬義兄弟備極歡迎，開特別招賢之禮，以示優遇，盡釋從前門戶之分別，冀贊將來光復之偉業，掃虜廷專制惡毒，復漢家自由幸福。仰我洪門人士一體知悉，須知招納天下英才，乃本總堂之主義，特此布告，統爲鑒照。天運辛亥年五月二十二日，美洲大埠致公總堂啓。

旅美同盟會員李是男等既加入致公堂後，孫總理卽向致公堂提議組織洪門籌餉局，以爲

黃花崗一役捲土重來之計，衆贊成之。遂由總理王訂洪門籌餉局緣起章程及革命軍籌餉約章若干款，以資遵守，即日成立洪門籌餉局，因對外關係，命名曰國民救濟局。局中職員由致公堂及同盟會二團體選用之。以黃三德爲監督，朱三進、羅敦怡爲總辦，李是男爲會計。同盟會員在局內任各項職務者，除是男外，有黃雲蘇、張鶴蘊、趙煜、黃傑亭、劉鞠可、黃伯耀、劉達朝、林朝漢、許炯葵、劉冠辰、廖達生、梁日東、余森郎、劉日初、伍平一、鄭超羣諸人。設辦事處於士沙福街三十八號致公堂二樓。成立之初，總理提議先電匯香港銀一萬元與香港黃克強，爲籌設暗殺機關經費。蓋黃克強憤黃花崗一役之敗，決計親入內地狙擊一二滿清大員，以振士氣，經總理及馮自由等再三勸勿躬自行險，始允另派黨員擔任實行事務，并要求美洲同志供給此項用費。故總理令諸同志尅日籌匯此款，以應要需。籌餉局遂遵命即匯黃克強萬元。兩月後滿將軍鳳山在廣州被炸，即此暗殺機關爲之也。總理復命籌餉局印刷一種中華民國金幣券。券面由中華革命黨本部總理孫文及中華革命軍籌餉局會計李公侯（即是男）兩人簽名蓋章，規定凡助餉美金五元以上者，發給金幣票雙倍之數收執，許於民國成立之日作爲國寶通用。關於辛亥三月二十九日廣州一役各地捐助之款，亦以此項金幣券發給之。是歲六月二十六日，衆議決推總理及黃雲蘇、張鶴蘊、趙煜四人，赴美國南北各埠演說募款。總理等遂於七月初二日分途出發。總理瀕行復虛同盟會員與致公堂中人仍多隔閡，不免影響籌餉大局，以馮自由與舊金山致公堂及大同日報素有關係，特電雲高華大漢日報令馮速赴美西相助。

馮得電卽於是月下旬由加拿大首途，抵美不及二十日，而武昌義師勃然大舉矣。籌餉局陸續匯款供應各省義軍，爲數頗鉅。十月初旬同盟會與致公堂洪門籌餉局三大團體以全國各省光復大半，國是不日大定，特公推馮自由爲旅美華僑革命黨總代表，回國參與組織臨時政府事宜。并將籌餉局發行已售未售之金幣券一切帳目攜歸繳呈革命政府銷號。馮歸抵上海在十一月朔，是月初六日 總理亦自歐洲蒞止，初十日當選臨時政府大總統。旋於民元一月一日赴南京就職。馮遂將所攜歸之中華民國金幣券帳目繳呈 總理報銷。隨後旅美同盟會員陸續回國服務於南京大總統府及各省政府者，有朱卓文、李綺菴、余夔、劉翰可、梅喬林、盧維溥、黃傑亭、伍橫貫、余森郎、黃芸蘇、劉成禹、張震蘊、趙煜、李伯眉、鄺灼、鄺林、黃晉三、朱本富、梅培、羅泮輝、程天斗、鄺輝、林朝漢、劉博文諸人。及民元四月南北統一，歸國黨員中自願回美留學由稽勛局派遣出國者，爲黃芸蘇、劉翰可、盧維溥、劉博文、余森郎、張靄蘊、趙煜、鄺輝等八人。是歲八月同盟會本部改組爲國民黨，旅美總支部從之。民二七月後贛寧皖湘閩粵各省討袁軍敗挫，國民黨爲袁世凱暴力解散，美支部於是奉 總理命籌募三次革命軍餉，經三次之奮鬪所獲成效在全球各地國民黨中首屈一指，以非本文範圍，茲不贅述。

六 南洋英荷二屬之部

革命黨之涉足南洋羣島，始於庚子（民元前十二年）總理之初抵英屬新加坡時，七州府各屬全爲保皇會勢力，有機關報曰天南新報，閩粵僑胞多傾向之。是歲日誌士宮崎寅藏親至新加坡，欲遊說康有爲，使與革命黨聯合共謀國是。康竟誣宮崎爲刺客，拘之入獄。總理特由西貢至新埠營救之，其地固尙無革命黨人之組織也。庚子秋惠州革命軍失敗，與中會員黃福、黃耀廷、鄧子瑜、尤列等先後亡命南洋，辛丑（民元前十一年）中和堂成立，華僑工農界翕然歸之。癸卯甲辰間（民元前八九年）陳楚楠、張永福等復有閩南日報之發刊。由是革命思潮始漸傳播於南洋羣島。及乙巳丙午間（民元前六七年）同盟分會遍設於英荷二屬各埠。南洋總匯報、中興日報、光華日報、星洲晨報、南僑日報、蘇門答臘報、泗濱日報等續紛並起，是爲革命黨全盛時期。丁未（民元前五年）同盟會所發動粵桂滇三省之義師，均有賴南洋僑胞之助。厥功非淺。茲分別述其組織如下。

（一）南洋中和堂

南洋英屬羣島向爲保皇會之勢力範圍。新加坡埠富商閩人邱菽園爲該地分會長，有機關報

名天南新報，日倡保皇邪說，華僑受感者大不乏人。與中會於庚子（民前十二年）惠州革命軍失敗之後，其將領黃福、黃耀廷、鄧子瑜等避居新加坡，該地始有革命黨人足跡，然其時僑衆風氣尙極閉塞，咸視革命黨如蛇蝎。黃鄧等爲工作餬口計，固絕不敢以真面目向人也。及辛丑（民國前十一年）與中會員尤列自日本至南洋，目的在宣傳革命排滿，因一般商界頑固性成，無從入手，乃在新加坡單邊街懸壺問世，精醫花柳雜病，男婦咸稱其能。於是乘機向農工二界及義興會員發揮反清復明之宗旨。且常投身烟館賭場，冀與下層社會意氣相投，以資運動，遂亦漸浸染阿芙蓉癖，經營半載，頗得農工人士之信仰，遂集合少數同志組織一小俱樂部，即仿倣橫濱中和堂辦法，仍以「中和堂」三字名之。堂中設關羽神像。以「忠心義氣手足相扶」等語爲號召，與普通海員所設航海會所大同小異。所異者即中和堂能添設各種革命書報以開通民智耳。新加坡會所成立之後，尤復遍遊吉隆坡、怡保、壩羅、檳榔嶼各埠，設立分堂。就中以吉隆坡會所爲比較宏偉。其所懸標幟，即用惠州革命軍之青天白日旗。然多數會員固不知此旗之歷史及出處也。時各埠會員多屬下層階級。文人中參加者只有黃世仲、黃伯耀、康蔭田三人。黃等皆以在粵家計困難，少赴南洋謀生，各在小埠賭場充任書記，因時向當地報館投寄論文批評時政，漸與尤相結識，而爲中和堂會員。其後世仲得任香港中國日報記者，伯耀蔭田同任新加坡圖南日報記者，即尤推荐之力也。癸丑（民國前九年）春革命潮漸及南洋，新加坡富商陳楚楠、張永福二人首贊同革命，特發起圖南日報以爲宣傳機關。尤於是報出版前贊助甚

力。乙巳（民國前七年）夏間復介紹陳張等與孫總理相識。旋於丙午春成立同盟會於新加坡，尤之力爲多焉。同盟會成立後，中和堂會員之有志者多由尤介紹加盟。惟各埠中和堂之小俱樂部尙有數處存在，僅爲聯絡感情起見，並無政治性質，故於乙巳後同盟會所經營之多次革命，均無所表見。辛亥民國成立，尤不久返國，南洋中和堂之名義自是寂然無聞焉。

（二）新加坡圖南日報

圖南報出世前之南洋 圖南日報爲南洋華僑革命黨機關報之鼻祖，在此報出世之前，新加坡有叻報及天南新報，檳榔嶼有檳城報，吉隆坡有南洋時務報。叻報、檳城報屬守舊派，天南新報屬保皇派，時務報屬基督教派。革命黨人之在南洋者，尙未有機關報之組織也。先是康有爲於戊戌政變後，嘗偕其徒侶梁啓超、徐勤、歐榘甲、湯覺頓等先後至新加坡組織保皇會，事前已得當地富商邱菽園（煒菱）之助，發刊天南新報。出版第一日，其報面大書「孔子降生二千四百四十九年即光緒二十四年己亥四月初八日」字樣。英屬各埠華僑從之者，大不乏人。庚子（一九〇〇年）七月唐才常漢口之役，邱菽園嘗向閩粵僑商募集勤王軍巨款電匯上海應之。是時革命黨人對於南洋羣島仍未開始活動，庚子六月孫總理因日本同志宮崎寅藏爲康有爲構陷入獄，特由越南西貢至新加坡設法營救，曾求助於舊友黃康衢、吳傑模、林文慶數人。林爲星州著名醫學博士，極得當地英吏信用，宮崎得以無事出境，即賴其斡旋之力，然黃、吳、林三

人均非黨員也。庚子閏八月惠州革命軍失敗，其將領黃福、黃耀廷、鄧子瑜諸人均亡命南洋。翌年（辛丑）興中會員尤列亦接踵而至。尤有辯才，以閩粵籍各富商性多頑固，不易感化，乃漸向義興會團體及農工二界鼓吹革命排滿，聞者多為感動。旋發起中和堂於新加坡，分會遍設檳榔嶼、吉隆坡、怡保壩羅各埠，從者日衆。天南報記者黃世仲、黃伯耀（世仲之兄）、康蔭田等亦加入中和堂為會員。尤更於中和堂所高懸惠州革命軍所用之青天白日旗，以作興中會一派相傳之表示，海外華僑團體首用青天白日為國徽者，中和堂實為之倡。時有閩籍富商廈門人陳楚楠慕尤列名，爰托天南新報記者黃伯耀介紹相見。楚楠有商店曰合春號，營木廠及罐果業，向與邱菽園為摯友，因得閱清議報、開智錄、新民叢報及各種書報，漸醉心新學，自號思明州之少年，知尤列為老興中會員，遂與老友張永福專誠請謁，一見如故。永福，粵之潮州饒平縣人，營新長美布疋店，亦有志士也。當癸卯（一九〇三年）閏五月上海蘇報案起，楚楠、永福及永福外甥林義順憤清廷肆虐，特用小桃園俱樂部名義致電駐滬英領事，請援保護國事犯條例，勿將章鄒引渡清廷，以重人權。其後復集資翻印革命軍五千冊，改名圖存篇，設法輸入漳、泉、潮、梅各鄉鎮，廣事宣傳。繼以提倡革命，非藉報館為喉舌不可，遂各出資創設圖南日報，為南洋羣島革命黨人之第一言論機關，尤列與有力焉。

圖南報出世後之南洋 圖南日報資本全出自楚楠、永福二人，地址在新加坡福建街二十一號，自癸卯秋冬間即已進行籌備，至甲辰（一九〇四年）春始事竣出版。初由尤列介紹鄭貫公

充任該報總編輯，賈公以方籌辦廣東日報辭，乃改聘陳詩仲承之，鄭、陳均前任香港中國報記者也。此外更聘尤列爲名譽編輯，黃伯耀、何德如、康蔭田、胡伯鑲、邱煥文諸人分任撰述譯務。第一日尤列作發刊詞，署名吳興季子，初印一萬份，後減作一千份。然長期定閱者僅三十餘份，蓋其時風氣未開，各商店多視爲大逆不道，羣起反對，且嚴誡其子弟夥友不許購讀，故出版多日，仍難推銷，僅作宣傳性之贈送品而已。是年冬，圖南報更別開生面，乘慶祝乙巳（一九〇五年）新禧之機會，印刊一種富有刺激性之月份牌，分贈華僑，以資宣傳。上題「忍令上國衣冠淪於塗炭，相率中原豪傑還我山河」二十字。下題「暫理皇漢帝位滿清光緒三十一年歲次乙巳爲耶穌降生後一千九百零五年至零六年」及「文字收功日，全球革命潮，圖開新世界，書檄佈東南。」等句。中刊自由鐘及獨立旗各一，異常美觀。英、荷兩屬各埠華僑工界各團體會所多懸諸座右，而報紙銷場亦因之遞增至二千數百份。乙巳冬圖南報爲華僑馮夏威自殺於上海美領事署前以殉美政府新頒華工禁約事，發起追悼會於仁濟醫院。先期預請當地華民政務司署批准開會，英官謂必須尤列不到會始可照准，陳楚楠等竟許之。尤列聞之大憤，及期先到會場登壇演說，痛言拒約抵貨之理由，及遷就外人之失當，座衆大爲鼓掌。事後英吏竟未干涉。未幾各地抵制美貨之風潮愈益擴大，適有英船載運政府定購之美貨到埠，碼頭華工激於愛國大義，咸拒絕起運，華民政務司乃請譯員何寬設法。何曰，若得圖南報主人陳楚楠、張永福二君代疏通碼頭苦力，乃易爲力。英吏遂邀陳、張至署，請其勸告各工人勿拒運美貨，陳、張

以無此能力卻之。英吏謂祇須二君代解釋英輪所載美貨乃當地政府先期定購之用品，與尋常商品不同，卽生效力，不必爲勸告工人語亦可。陳張勉爲署名，此項公告張貼後，不及半日，英輪之貨完全卸陸。英吏聞之，始知圖南報對於羣衆之勢力，爲之稱異不置。

孫總理與圖南報之關係 孫總理向知南洋尙無革命派報紙，恆引爲憾事，及甲辰秋自日本至檀香山，嘗助檀山新報爲文，與保皇派之新中國報大開筆戰。偶見圖南報致檀山新報請求交換報紙函，及寄來報紙月份牌等，知吾道不孤，至爲欣悅。乃親寄美金二十元至圖南報購取乙巳年月份牌二十張，復移書尤列查詢該報爲何人組織，以便通訊。又圖南報記者陳詩仲未就圖南報職時，總理在日本已聞其因事脫離中國報，及蒞檀島，乃函囑余介紹詩仲任檀山新報主筆，詩仲初允就聘，後以駐香港美領事不允簽發護照，始改就圖南報之約。總理先後得余及尤列報告，知圖南報操筆政者卽屬彼意中之陳詩仲，尤爲愜意。是年六月自歐洲東歸，先期函電尤列，秦力山等，囑於舟過新加坡時引諸同志相見。屆期，秦力山以深入滇邊未能赴約，尤列遂領陳楚楠、張永福、林義順等登輪晉謁，總理告以歐洲留學界已成立革命黨機關，此次赴日本，諒不日亦可成立，囑尤等在南洋預爲佈置，以利進行，尤等咸爲樂從。是爲孫總理與南洋同志結合之嚆矢。

圖南報之停刊及改組 圖南報發刊不及一載，以銷路不廣，虧折甚巨。賴楚楠、永福二人辛苦支持，尙能勉強出版，將及二年，前後支出不下三萬元，以是賠累益甚，且積欠編輯部及

排印工人薪金爲數不貲。記者陳詩仲因此辭職返國，司理林采達以避工友索資，亦匿跡不見。至乙巳年冬，遂不得已宣告停版，兩月後楚楠、永福不欲民黨喉舌中斷，復謀集資重整旗鼓，繼續發刊。適有友人黃江生介紹商人許子麟、沈聯芳、陳雲秋、朱子佩等合股改組新報，擬組織資本二萬元，圖南報所存機器鉛字傢具等物作爲價值一萬元，其餘半數由許等擔任，另遷新址，定名南洋總匯報。出版之初，仍由楚楠、永福主持，報面不用大清年號，稱清帝光緒爲載湫，與以前圖南報之立言宗旨尙能終始一貫。詎陳雲秋、朱子佩二人思想頑固，力誠當事人不得登載激烈文字，而各記者不之恤，仍高談革命如故。至丙午（一九〇六年）春，雲秋等遂提出拆股承讓之議，後乃改爲抽籤，卽由抽得者接受報業，結果爲雲秋一派所得，楚楠等僅取回拆股金五千元而退。其後南洋總匯報漸爲保皇派入寇，所聘記者均屬康門徒侶，徐勤、歐築甲、伍憲子等卽憑藉此報與革命黨爲敵，南洋之民黨喉舌因之啞者年餘。翌年七月，始有第二言論機關之中興日報繼起。

（三）新加坡南洋總匯報

圖南報於乙巳（民國前七年）春以資本不足歇業。陳楚楠、張永福二人不忍革命黨之喉舌爲之中斷，復於是年秋聯絡商人許子麟、陳雲秋、沈聯芳、朱子佩諸人創辦南洋總匯報，以爲之斷。是報由革命派及中立商人派各佔資本半數。雲秋素性畏官，胆小如鼷，力誠當事人不得登

載激烈文字。而陳楚楠、張永福不之恤，仍使編輯人高談革命如故。至丙午年（民國前六年）春，雲秋恐爲革命黨所累，遂提出拆股承讓之議，後乃改爲抽籤，由兩派中之抽得者接受報業。結果爲雲秋一派所得。雲秋接受後，乃約保皇會員某等加股合辦，不久是報竟成保皇會之純粹機關報。康徒徐勤、歐榘甲、伍憲子等遂憑藉之與革命黨爲敵。各方同志咸咎陳楚楠、張永福二人事前措置不善之失策。

（四）新加坡同盟會

新加坡同盟會成立於乙巳年冬，先是總理於是歲五月從歐洲赴日本過新埠時，尤列引南報同志陳楚楠、張永福、林義順等登舟相見。總理謂在歐時，德法比諸國留學生已成立革命團體，此行到日本即當組織革命黨總部，南洋各埠可設分會，不日當由日本寄來章程及辦法，囑各人預爲籌備。楚楠等唯唯。總理蒞日後，即於六月杪與各省志士發起中國同盟會於東京。是冬重遊新埠，適是時該地政府禁止入境之期已滿，楚楠等遂歡迎登陸，尋設立同盟分會，爲南洋英荷兩屬之總機關部，假晚晴園爲會所。首次開會加盟者，有陳楚楠、張永福、林義順、許子麟、劉金聲、黃耀廷、尤列、鄧子瑜、張華丹、吳悟叟、林幹廷、張秉庚等十二人。衆舉楚楠爲會長，永福副之，許子麟爲會計，林義順爲交際。以後陸續加盟者，有丘煥文、何德如、沈聯芳、盧耀堂、李曉生、李渭川、謝己原、謝心準、謝儀仲、黃乃裳、許雪

秋、鄭聘廷、胡少翰、何心田、李凌溪、黃康衢、陳武烈、陳芸生、林文慶、陳嘉庚、林航葦、黃吉宸、吳應培、陸秋露、周之貞、康蔭田、徐統雄、周華、羅仲霍、黃鶴鳴、李文楷、李竹癡、郭淵谷、胡伯讓等四百餘人。繼復派員分赴英荷兩屬及緬甸各埠設立分會。楚楠等更向各埠同志招股重組黨報，於丁未（民國前五年）七月出版，即同盟會南洋唯一機關之中興日報是也。戊申（民國前四年）二月，總理從越南河內移駐新埠，寓東陵東明律一一一號，會務益形發達。是歲四五月間，黃克強、胡漢民以雲南河口之役兵敗，亦先後離越南到新。是役敗軍將士韋雲卿等六百餘人被越南政府遣送前來新埠，英官初不許入境，經總理向當地政府聲明爲政治犯，並非亂民，并使楚楠、永福等向當局保證一切，始許登陸。是時對於革命軍將士之給養問題極形困難。總理令楚楠開闢中興石山於蔡厝港以安插之，且介紹於檳榔嶼吉隆坡吡叻文島各埠工廠礦場農場，使各安生業。經營數月，而此項善後問題始告一段落焉。

戊申年秋，總理以英荷兩屬各地陸續成立分會及通信處者，有百數十埠，乃更設立南洋支部以統治之。特派胡漢民爲支部長，另訂中國同盟會分會總章十六條及通信辦法三條，通告各處團體，一律遵守。時河口敗軍將士雖已多方設法安置，然以分子複雜，良莠不齊，常發生妨害地方治安情事。清領事更藉端要求英吏干涉革命黨行動。因之黨務進行愈形棘手。翌年己酉（民國前三年）春，總理遂決意將南洋支部移於檳榔嶼，令胡漢民歸香港擴張南方黨務，自赴歐美遊歷，以謀國際上之協助。新埠黨務自總理他適後，中興日報旋亦以乏人支持，

通告停刊，遂於無形中失其領導之地位。及庚戌年（民國前二年）十月，黃克強、趙聲、胡漢民等赴檳榔嶼謁總理，謀集巨款在廣州再舉，各埠黨員莫不踴躍捐輸。胡漢民、鄧澤如等嘗詣新埠，召集黨員開會於晚晴園，蒞會者有沈聯芳、盧禮明、李孝章、陸秋露、周之貞等百餘人，合得捐款三千餘元，中以沈聯芳所捐一千元爲最巨。其後各復加捐若干，合英屬各埠共得四萬七千餘元，是卽辛亥三月黃花崗一役華僑義捐之一部。

（五）南洋支部

自新加坡同盟會成立後，英荷二屬各地陸續組織分會或通信處者，有百數十埠，概歸新加坡統轄。及戊申某月總理自河內移居新加坡，更設立南洋支部，特派胡漢民爲支部長，另訂中國同盟會分會總章十六條及通信辦法三條，通告各處團體一律遵守。茲附錄南洋支部通告及同盟分會總章如左：

啓者，近年以來，南洋各處同志日多，各就所處結合團體，以實行宗旨，發展勢力，真有蒸蒸日上之勢，殊可慶慰。今在星加坡設立南洋支部，欲使南洋各處團體，互相聯絡，以成統一。夫欲聯絡情誼，必以消息相通爲主，消息通則情誼洽，情誼洽，則協力相扶，同心共濟，而黨力滋偉，成事可望。故特定通信辦法三條如左：

（一）今將各處團體通信住址開單寄覽，以後至少每二個月互相通信一次。

(二)各處團體通信地址有移換時，須即通知南洋支部。

(三)以後如續有新立團體，即由南洋支部（支部長胡漢民）發信通知，各處接信後即寄書新立之團體，賀其成立，且勉勵之。

以上三條望留心照辦，以團結同志之精神，廣通各處之情誼，是所至囑。此致各埠同志兄鑒

孫文謹啓

中國同盟分會總章

一、本會定名為中國同盟會，直接受支部之統轄。

一、本會以實行贊助中國革命事業為職志。

一、本會會員須謹奉宗旨，親寫盟書，當天宣誓，以表其誠。

一、本會公舉如下職員，以司理會中事務。

正會長一名 中文書記 名 理財 名 調查員 名

副會長一名 英文書記一名 核數一名 幹事員 名

一、本會職員定例每年選舉一次，并每會員增至一倍時選舉一次。

一、本會員皆有選舉權及被選舉權。

一、當地會所及一切經費由會員均分擔任。

一、凡會員皆有介紹同志入會之權。

一、凡會員能解釋宗旨明白者，皆可任爲主盟人，隨時隨地收接同志入會。
一、凡主盟人收接同志入會後，須將盟書繳交書記註冊，由書記彙交支部收存，發給底號收執爲據。

一、凡會員既完盡一己之義務，領有底號者，至革命成功之日，得列名爲中華民國創建員，以垂青史，而永誌念。

一、凡會員能介紹及主盟新同志十人者，記功一次，百人者記大功一次，至歲終計功，由會長宣勞嘉獎，並由支部代請本部總理給功牌表誌，至革命成功之日，得與軍士一體論功行賞。

一、本會欲使會衆團體密切，聲氣靈通，特仿革命軍隊編制之法，以組織會衆，其軼如左：（此條請卽施之實事）

以八人爲一排 內自舉排長一人 共八人

以三排爲一列 外自舉列長一人 共二十五人

以四列爲一隊 外自舉隊長一人 共一百零一人

以四隊爲一營 外自舉營長一人 共四百零五人

一、以各列長隊長營長等人員爲會衆之代表人。

一、本會辦事各種詳細規則並特別專條，可隨時由職員召集各代表會議訂立。

一、本會各等規則專條，總以不違背支部號令及本會章程爲範圍。

(注意)組織會衆爲營爲隊爲列爲排一條爲極緊要，有此則會員之感情乃能密切，團體乃長堅固，不致如散沙。會中有事由職員通傳於各營長或各隊長，各轉傳於其所屬之隊或列長，則一人不過走報四人知，列長不過報四個排長，排長則報七人知。如此工夫易做。若收月費，會員交於排長，排長交於列長，列長交於理財員，亦事簡而效大也。若不行此法，則他日每埠入多至一千或數千，則無人能遍識會員，而分會機關之職員，亦無從遍知各人之住址行踪也。故必當排列，一排長識其所交好之七人不爲難，一列長識識三個排長更易，由營而隊而列，猶身之使臂，臂之使指，節節腦筋相連靈活也。

(五)新加坡中興日報

新加坡自南洋總匯報分裂後，革命喉舌緘默者一載有餘。丁未年春陳楚楠、張永福、許子麟、陳先進、沈聯芳、鄧子瑜、林義順諸人向各埠同志募集資金組織中興日報，以繼承昔年圖南日報之統緒。籌備數月，至是年七月十二日始告出版，地址在吉寧街十二號。初由馮自由在港代購鉛字，并介紹中國報記者何子耀充任編輯，何以事辭職，乃改延田桐王斧承乏。發刊未久，即與南洋總匯報爲革命論與立憲論之大筆戰，先後任撰述者有居正、陶成章、林時壘、胡漢民、汪兆銘、方瑞麟、林希俠、張紹軒、周杜鵑、何德如、胡伯驥諸人，任司事者則有林義

順、鄧慕韓、湯伯令、蕭百川、吳悟叟、周華、羅仲霍諸人。當兩報筆戰期間，總理適於戊申年（民國前四年）二月從越南移居南洋，故東京民報諸記者亦相繼蒞止，一齊加入戰線，論爭至爲激烈。時總匯報嘗湊合民黨諸記者姓名戲撰一聯以嘲中興日報曰：「藥石（居正筆名）無靈精衛含冤填恨海（田桐筆名），漢民遭劫社鵲啼血怨西林（張紹軒別號）。」可謂諷而虐矣。中興報銷數達四千餘份，各埠僑衆直接受其感化，實非淺鮮。及己酉年三月，總理遠遊歐美，陳楚楠以歷年爲革命耗資，發生兄弟爭產涉訟事。張永福亦因商務虧折，幾致破產，中興報負債纍纍，屢次招股，均隨手輒盡，無法抵欠。卒於庚戌夏間停版歇業，南洋黨員莫不引爲憾事。

（七）新加坡三大書報社

新加坡革命同志之組織書報社，遠在同盟會成立前數年。有星洲書報社者，成立於壬寅年（民國前十年）。其倡辦人爲鄭聘廷，社址初設於吉寧街。乙巳年乃遷至丹絨巴葛禮拜堂樓上。社中陳列各種書報，任人瀏覽，中以革命書報爲多，亦宣傳革命機關之一也。戊申年同盟會員何心田、何德如、胡兆鵬、胡亭川等更設立開明演說閱報社，按期敦請民黨名流演說革命真理，實開南洋風氣之先。更有郭淵谷、康蔭田、何蘆生、謝坤林、沈飛龍、周獻瑞、陳鐵漢、何心田、何柏軒、吳逢超、何海星、陳毓卿、何漢塗諸人組織演講隊，每星期日在各通衢

爲梓寧清政反對立憲之露天演說，慷慨激昂，聞者感動。辛亥春趙鈞溪、潘兆鵬、張仁南、劉七輝、劉凌蒼、劉任臣、郭淵谷、許伯軒、謝坤林、鄭子輝、吳一鳴、許夢芝等發起同德書報社於亞來良街，此外英荷兩屬各埠先後開設書報社，多處均與革命黨員有直接間接之關係。

(八)新加坡星洲晨報

星洲晨報出版於己酉年（民國前三年），爲同盟會員謝心準、周之貞等所創。是歲香港中國日報記者謝心準因事至南洋，初任中興報編輯，旋與同志周之貞措資發刊此報。其倡導革命抨擊君憲，與中興報相伯仲，且暢銷於英荷兩屬各埠，收效亦巨。惟出世不及一年，即以資本不足於庚戌秋冬間停刊，於是職員星散，其司賬員勞培及收賬員周華返粵後參加辛亥三月廣州黃花岡一役，爲國殉義，足爲華僑生色。

(九)新加坡南僑日報

新加坡自中興日報星洲晨報相繼停刊後，同盟會務最爲不振，革命黨之喉舌緘默者將及一年。及辛亥三月廣州之役失敗，南洋僑胞之思想，異常振奮。當地同盟會員益覺缺乏言論機關之失當。時陳楚楠張永福二人均以商業失敗，無心黨務，遂有盧耀堂黃吉辰等重組南僑日報，

以爲中興日報之繼。出版後大受英荷兩屬人士之歡迎，發刊數月，適遇武昌革命軍起，各省陸續響應，僑衆多根據此報所傳達之消息爲趨向云。

(十) 英屬七洲府同盟會及光華報

七洲府卽英屬海峽殖民地之總稱，凡新加坡檳榔嶼（又名庇能）吉隆坡怡保吡叻壠羅大小各埠均屬之，其首府設於檳榔嶼。丙午總理派陳楚楠林義順至檳榔嶼設立同盟分會，先後加盟者有吳世榮、黃金慶、陳新政、辜立亭、林志誠、丘明昶、薛木本、陳民情、徐洋溢、熊玉珊、呂毓甫、徐宗漢、王壽蘭、丘有美、林福全、丘文紹、潘奕源、丘能言、鄭玉指、林世安、陳璧君、王德清諸人。公舉吳世榮爲正會長，黃金慶爲副會長。金慶等舊設檳城日報，係商界中立性質，然於革命宗旨隱然贊成。又設檳城書報社，地址在甘菜園九十四號，條理整然，足爲南洋各埠書報社之模範。庚戌年（民國前二年）夏秋間，仰光同志莊銀安以該埠所設光華報迭受清領事之摧殘，乃避地檳榔嶼，與陳新政、黃金慶、徐洋溢等重組光華報於其地，聘雷昭性（鐵崖）方次石周杜鵑等爲主筆，崇論宏議，與新加坡之中興日報後先輝映。先是總理於己酉三月赴歐洲時，已將南洋支部移至檳榔嶼，及庚戌七月從日本再來南洋，卽挈眷移居檳榔嶼柑仔園。是時曾通告南洋各埠，令做美洲黨員新例，將盟書內「中國同盟會會員」字樣改爲「中華革命黨黨員」，然爲日無多，事實上未易實行。是冬黃克強、趙聲、孫德彰、胡

漢民等同聚檳榔嶼，謁總理商定廣州大舉策略，決議分途募款，以利進行。未幾總理因在清風閣演說革命，為當地政府限令一星期離境，遂有美洲之行。其眷屬仍居柑仔園，每日家費由檳榔嶼及吡叻吉隆坡芙蓉四處黨員分任供給之。統計辛亥三月二十九日廣州之役，英屬七洲府各埠合籌軍餉共四萬七千六百餘元。至於各埠得力黨員，在吉隆坡有陳占梅、阮英舫、阮卿雲、阮德三、王清江、劉襟俠、陸秋傑、陸秋泰、丘怡領、王君贊、陳秀蓮、張志昇、杜棠等，在怡保有區慎剛、李源水、李孝章、湯伯令、鄭蝶生、劉業興、黃怡益、梁燊楠等，在芙蓉有黃心持、譚容、朱赤霓、蔡熾三、伍熹石等，在爪勝卑那則有鄧澤如等，在麻六甲則有李月池、沈鴻柏等，在關丹有陸秋露等，在金寶有楊朝棟等，在林明有馮子芸等，在太平有陸文輝、陳志安等，在式叻有鄧清泉等，在麻坡有湯壽山、劉靜山等，在砂勝越有羅從諫、蕭春生、李振殿等諸人。又各埠多設書報社，其中有純粹為同盟分會者，有與同盟會員具相當關係者，有因當地商會或中華會館為守舊派或保皇會所把持，故另創新團體以樹對抗者。此類書報社有百數十處。其地名社名另載下文。

(十一) 英屬各埠書報社

乙巳年以後英屬大小各埠相繼設立書報社，其中有純粹為同盟分會者，有附設於學堂者，有因當地商會或中華會館向為守舊派或保皇黨所把持，故另創新團體以樹對抗者。此類書報社

成立於民元以前者有百數十處，茲就調查所得，錄其地名社名如次：

新加坡公益書報社

新加坡同德書報社

庇能檳城書報社

吡叻華僑書報社

吡叻沙叻培文書報社

吡叻拿吃興華書報社

吡叻萬里望民興書報社

吡叻金寶開智書報社

宋溪詩佛文墨書報社

芙蓉書報社

麻六甲中華書報社

實兆遠益智書報社

魯乃坡益民書報社

布知埠益智書報社

隆邦書報社

新加坡星洲書報社

新加坡同文書報社

庇能益智書報社

吡叻蒲蘆江秀覺民書報社

吡叻安順培智書報社

吡叻端洛中興書報社

吡叻布先益智書報社

吡叻美羅萃羣書報社

六條石埠書報社

柔佛公民書報社

雪蘭峨士我月埠書報社

巴東色海東華書報社

檳榔嶼大山脚華僑書報社

蘇楮巴轄益羣書報社

砂勝越啓明書報社

- 知知埠華商書報社
高淵埠書報社
紅毛丹達材書報社
吡叻文東書報社
萬撓育智書報社
雪蘭峨介文書報社
吡叻北千光漢書報社
甲洞開明書報社
安邦埠書報社
加蕉埠啓明書報社
加影文華書報社
納閩坡啓文書報社
巴里文礁新華書報社
北般鳥山打根中華書報社
新馬儘新華書報社
喃巴哇覺羣書報社
- 朱毛埠啓智書報社
打吧埠益羣書報社
吡叻古樓南華書報社
巴生羣智書報社
金寶中國青年益賽會
吉隆坡中國青年益賽會
蔴坡啓智書報社
素哩哩開智書報社
叻思埠公益書報社
雙文丹埠斯文書報社
都儘啓蒙書報社
關丹中華書報社
武來岸策羣書報社
甲板埠同德書報社
吉礁雙溪丹年新漢書報社
文丁埠華商書報社

巴生港中國青年益賽會

巴楮巴哈益羣書報社

緬甸瓦城振漢書報社

緬甸勃生埠漢興書報社

緬甸勃臥埠培民書報社

古毛埠競明書報社

緬甸仰光覺民書報社

緬甸惹申亞沙漢維華書報社

緬甸丹老埠新民書報社

緬甸摩洛棉漢聲書報社

(十二) 荷屬各埠書報社

荷屬羣島書報社之多不亞於英屬，多數附屬於學堂之內，故其名即以所屬學堂之名冠之。乙巳丙午（民前六七年）間，新加坡中興公司主人張誠忠受荷屬文島各埠華僑之托，欲聘用教員多人，張商諸陳楚楠，陳爲介紹於香港馮自由，於是馮乃分函東京漢口安慶廣州各處機關，請推薦同志赴海外爲教員。是時應聘者有易本義、張繼、李柱中、時功璧、陳方度等二十餘人。此外各埠延致之教員，尙有董鴻禕、王嘉榘、王文慶、沈鈞業、魏蘭等，均屬留日學生而有心革命者。董鴻禕乃東京早稻田大學所推薦，就聘時尙未畢業，該大學特爲提前考試，用壯行色。荷屬各校自董易張王李陳時沈鍊等設教以來，革命學說遂灌輸於學生及其家長，多在校內附設書報社，以開通民智提倡民權爲務，而書報社遂成革命機關之變相焉。茲就調查所得，凡書報社成立在民元以前者，錄其地方及團體名目如次：

巴達維亞華僑書報社

三寶壟樂羣書報社

巨港中華書報社

井帝汶同文書報社

西都文羅書報社

文島雙溝烈中華書報社

巴眼亞比亞民德書報社

毛燕埠日新書報社

美崙埠公益書報社

東婆羅洲古達馬路中華書報社

亞齊瓜勝新邦啓文書報社

松柏港民羣書報社

坤甸白樹脚羣生書報社

文島加勿士中華書報社

蘇門答臘巴東書報社

文島雙溝烈明德書報社

泗水明新書報社

大亞齊書報社

巴城老巴塞書報社

南榜書報社

文島檳港中華書報社

萬隆埠民儀書報社

其沙蘭中華書報社

龍目安班瀾漢光書報社

浮盧甘罷中華書報社

山口洋民生書報社

坤甸圖存書報社

萬里望智羣書報社

締汶叨覺羣書報社

勿里洞華僑書報社

監光登宜開智書報社

哥踏丁疑覺羣書報社

滄汶叻利覺羣書報社

日里民禮書報社

日里直名丁宜開智書報社

日里巴株巴勞中華書報社

日里武麗安中華書報社

日里火水山中華書報社

日里籠葛中華書報社

日里棉蘭華崇書報社

日里瓜勝中華書報社

日里昔冷中華書報社

覺厘洞岸黨書報社

日里瓜勝新邦中華書報社

日里頓挽中華書報社

日里大棉中華書報社

日里勿叻灣中華書報社

日里瓦冷中華書報社

日里新邦知甲中華書報社

日里直名丁宜開智書報社

日里仙遠中華書報社

亞齊士吉利中華書報社

(十三) 荷屬各埠同盟會

新加坡同盟會成立後，同盟會本部於丙午、丁未兩年迭派謝良牧、李柱中、李天鄰、陳方度、曾連慶、梁墨菴諸人赴荷屬各埠組織分會，因避荷官干涉，多稱書報社或某某學堂，以掩飾耳目。各地主持黨務者，泗水有劉亞泗，巴城有梁墨菴李天麟，八打咸甲太有許金璋，文島檳港有溫慶武李柱中曾連慶，雙溪烈有黃慶元，勿里洋有伍連忠，勿里洞嗎吃埠有歐陽福成，

武陵埠有徐雲興，流石埠有藍瑞元，日里棉蘭有梁瑞祥歐水應李增輝，坤甸有沈復權，三寶壟有李載霖。至於各學堂及書報社之設立，遠在壬寅癸卯（民國前九十年）間。某學校曾向日本早稻田大學求介紹教員，早稻田大學以董鴻禕荐，其後董復介紹王嘉樂、王文燮、沈鈞業、魏蘭諸人分赴各埠設教，董王沈等皆留日學界之革命前輩也。及乙巳內午間（民國前七八年），新嘉坡中興公司主人張誠忠受荷屬文島各埠華僑之托，欲聘用教員多人，張商諸陳楚楠，陳爲介紹於香港馮自由，於是馮乃分函東京漢口安慶廣州各機關，請推荐同志赴海外爲教員。先後應聘者有易本義、張繼、李柱中、時功璧、田桐、陳方度等二十餘人，由是革命學說遂沛然灌輸於學生及其家長，多在校內附設書報社，即以學校之名稱名之，而書報社遂成革命機關之變相焉。荷屬各埠此類書報社陸續成立者五十餘處，其中最著名者，有蘇門答臘亞齊埠書報社坤甸圖存書報社泗水書報社三寶壟樂羣書報社老巴剎書報社野橫埠書報社巴城書報社日里棉蘭華崇書報社日裏民裏中華書報社文島濱港中華書報社文島雙溪烈啓智書報社等等，皆與該地同盟會員有直接關係者也。又各埠黨員開設之報館，泗水有泗濱日報及民鐸報，日裏棉蘭有蘇門答臘報，田桐曾任泗濱日報主筆，因著南篇涉及荷屬政治，竟爲爪哇政府勒令出境。張繼曾編譯青年荷屬華僑抵抗荷人之革命史，載諸香港中國日報，尤爲難能可貴，惜無存稿。丁未戊申間（民國前四五年）陶成章遍遊荷屬羣島，大倡光復會，用江浙皖贛閩五省革命軍名義募款，不受同盟會本部節制。李柱中、曾連慶、王文慶、許雪秋、陳芸生等助之。泗水富商蔣報

和蔣報禮兄弟亦入其會，故勢力頗盛，駸駸有取同盟會而代之之勢。戊申河口革命軍起事，汪兆銘鄧子瑜奉總理命往荷屬籌餉，至文島時，大受光復會會員反對，無功而還。庚戌（民國前二年）冬，黃克強至南洋籌募廣州起義軍資，力勸李柱中陳方度等捐除意見，合力籌款。陳李等從之，且願赴粵參加義舉。是役曾派謝良牧、黃甲元、古亮初、伍連忠、梁紐若、劉芷芬、曾伯諤、姚雨平、吳偉康、溫慶武等分頭募集。結果於辛亥三月廣州一役以前得款三萬餘元，而同盟會已散渙之勢爲之一振。

七 緬甸之部

革命黨人與旅緬甸華僑發生關係，始於乙巳（民元前七年）春，湘人秦力山之首蒞仰光，時僑商莊銀安方任保皇會緬甸分會長，并主持該地惟一華文報之仰光新報。力山以同志徐贊周之介訪謁銀安，力闢康梁邪說之謬，銀安豁然醒覺，遂向康有爲宣佈絕交。力山復著革命箴言長篇載於仰光新報，南洋各地僑衆漸次皈依革命真理，此文大有力焉。明年丙午十月力山在瀛邊干崖染疫逝世，革命黨在緬甸之活動爲之擱淺者兩載有餘。至戊申年（民元前四年）東京同盟會本部及新加坡分會始派員到仰組織革命團體，而緬甸同盟會始宣告成立。同時總理復派楊振鴻、居正、呂志伊等主持當地之光華日報，由是革命文字之聲威爲之一振。楊居呂等與保皇黨及清領事明爭暗鬪者數年，遭滿清鷹犬摧殘，不爲少屈。光華報曾改稱進化報，後復改稱全緬公報，數度被逼改組。至辛亥秋武昌起義，始告文字之收功。其掙扎情形之艱難困苦，可概見矣。茲次第述之如次：

（一）仰光新報

甲辰年（民國前八年）康有爲自印度抵緬甸，以保救清光緒帝爲號召，華僑受惑者頗不乏

人。康以閩商莊銀安名望素隆，特任爲全緬保皇會會長，設會所於仰光五十六路。時銀安與殷商多人開設仰光新報於勒達街二十號，自任報館經理，其股東新舊不一，故報社毫無宗旨，主張不定，特一保守式之報紙而已。乙巳年（民國前七年）五月湘人秦力山（力山傳載拙著革命逸史第一集）自香港至緬，見仰光新報形式腐敗，思有以改革之。遂由閩籍同志徐甘泉介見銀安，詳述康梁棍騙海外同胞之經過，及革新該報言論之必要，銀安豁然覺悟，允設法改良。力山於是草革命箴言二十四章，凡六萬餘言。登出後，南洋各埠僑衆爭相傳誦，保皇黨徒因而中悔，脫黨者，日有其人。時報館董事有隸保皇會籍者，恨力山攻擊康梁不留餘地，強將未刊餘稿私行燬滅，以爲報復，故此文僅刊至十六章而止，所餘八章盡被埋沒，讀者莫不引爲憾事。仰光新報自是復爲頑固派所操縱。銀安及徐甘泉陳贊周等乃組織一商務調查會月報，名爲振興實業，實以鼓吹民族主義爲宗旨，欲延力山爲編輯。時力山方在滇邊干崖辦學，正擬尅期返緬，就是報之聘。詎瀕行時忽染病身死。銀安等聞耗，如失師保，仍延張石泉蕭少珊二人主持筆政。出版數月，毫無精采，與仰光新報相繼停刊。至戊申（民國前四年）八月緬甸始有正式革命黨報之出版。

（二）仰光同盟會

旅緬甸華僑之具有新思想者，始於癸卯（民國前九年）閩人林國重、陳金、杜誠誥、陳甘

泉、莊銀安、徐贊周諸人之倡設中華義學於仰光大埠。同時莊銀安徐贊周更另設一益商夜學，以利僑胞之日間不暇攻讀者。是歲康有爲由印度來緬組織保皇會，銀安及一部僑商誤認康爲熱心愛國，頗爲所愚，獨徐甘泉陳贊周數人主張革命排滿最力，不肯入其彀中耳。乙巳（民國前七年）五月湘人秦力山自香港抵仰光，以閩人李竹癡之介，下榻於陳甘泉宅。泉甘引之見銀安，詳述康梁棍騙華僑歷史，及己身參加漢口富有票經過，銀安豁然覺悟。於是衆僑商公請力山重修中華義學章程爲民族主義教育，并求時向銀安所主辦之仰光新報撰作論文，以啓愚蒙。力山因作革命箴言六七萬字，連續登載報上，緬僑之知識因之大開。是文刊至十六章，竟爲該報頑固股東私自燬滅，讀者咸以不得一窺全豹爲憾。時力山方在滇邊干崖土司辦學，丙午（民國前六年）秋，徐贊周等另組織一商務調查會月報以代仰光新報，力邀力山回緬主持筆政，力山於首途前得病，竟於是年十月十一日卒於干崖。說者謂緬甸革命黨之成立，因力山之死而延擱兩年，非無故也。

仰光同盟會之成立，較南洋英荷兩屬稍遲。戊申年春三月王羣由日本帶來同盟會本部委任證書，徐贊周、陳仲赫、陳守禮、張源、陳國章、沈繼昌、林水都、王永和、林金源等十餘人率先加盟。旋開第一次成立大會於仰光大賀胥園，以外間反對者衆，開幕三月，僅得會員三十人。贊周等乃商設機關報，以張黨勢，得巨商陳玉著張永福（與新加坡之張永福同名異人）陳金在會廣庇多人附股，報社賴以成立。是歲八月朔日同盟會機關之光華報出版，主筆爲滇人

蒙	摩尹	壽	生仁	蘭	姜	鄭	庇	勃	生	陸	子	卿
吉	桃	陳	文	造								

緬甸同盟會成立後，以先後籌款維持黨報之故，對於總理歷次募餉，不能多所協助。戊申至辛亥之四年間，汪兆銘、陶成章、胡漢民、黃克強等相繼來緬籌餉，銀安等每次均以數千元助之。各黨員因迭受清領事及保皇黨之構陷摧殘，極形艱苦。據徐贊成所藏緬甸同盟會人名總冊，從戊申三月成立起至辛亥年止，實發給會員底號共二千三百四十三人。爲國內外各地同盟會所存名冊之最完整者，殊屬難能可貴。

(三) 仰光光華報及進化報全緬公報

仰光光華報設於百尺路舊門牌六十二號，初由黨員莊銀安、徐贊周、陳守金、陳興瑞、陳玉著、李海國、陳清波、陳文豹諸人集資緬幣八千餘盾，以三千盾承購舊日仰光新報之鉛字趕行出版。莊銀安任經理，陳仲赫副之，總主筆爲楊秋帆居正二人。先後助理編輯者有黃大哀、何榮祿、蘇鐵石、傅春帆、陳紹平、林文曲、黃蘭士諸人，其股本多半招自普通商人，非盡黨員也。是報初出版，即大倡革命排滿，尤抨擊康梁，不遺餘力。康黨嫉之如眼中刺，陶成章所著浙案紀事，即在是報登載。未幾秋帆以事入滇，荐滇人呂志伊（天民）自代，康黨初噤

使此報股東之非黨員解散報業，計不得逞，會是冬清帝母子同時斃命，天民在報上徵聯曰：「攝政王興攝政王亡建虜興亡兩攝政」，應者雖多，惜無佳構。時黨員盧喜福忽發奇想，私電袁世凱，請立漢人爲帝，乘機革命以傾覆滿祚。清廷因是根究電報來源，遂向英公使交涉，重訂電報新約，以後旅緬華僑有電達本國政府者，不得代爲傳遞。此例至民國成立後二十餘年猶未廢除也。時保皇派商家乘勢冒用全體商人名義，請清廷簡派領事駐緬，清廷准之，旋派蜀人蕭永熙到仰光任領事一職。光華報因該領事藉爲喪家點主事，時向僑商敲詐巨款。天民特用「領事神主」爲撰一聯，加以譏刺。蕭永熙老羞成怒，遂以行文抄沒本籍財產爲辭，威嚇該報之七股東代表，令卽解散報館。七代表獨李海國一人堅決拒之，餘六人畏禍被逼，竟覩顏屈伏。是報遂不免於停版拍賣，且爲康黨間接出資購得，聞者莫不切齒。康黨既攘奪是報，乃易名商務報，延張石朋李牙聰二人爲主筆。石朋筆名頑石，牙聰綽號鬻子，皆保皇會員也。同盟會以報被攘奪，遂開全體大會籌募復興資本，一夜得資一萬三千餘盾。是冬十一月初一日乃有第二之光華報繼起，地址在五十尺路二號。先後任經理者，有陳仲赫、黃永田、陳漢平等，主筆政者仍爲居正呂志伊二人。是報復活，仍與商務報大開筆戰。未及數月，商務報記者張石朋知邪不勝正，自願皈依革命真理，毅然脫離該報。李牙聰遂亦緘口無聲，時人戲撰一聯曰：生公（居正筆名）說法，頑石點頭，天民示威，鬻子投地，卽指此事。無何，商務報以寡助歇業，民黨勢力爲之益張。庚戌（民國前二年）夏，康黨勾結清領事謀傾陷光華報以洩憤，由蕭

永熙電請外部，動以危辭。清外部遽向英公使交涉，誣陷光華報鼓吹無政府主義，請將該報當事人驅逐離緬。英使以告緬甸總督，緬督遂下令驅逐居正陳漢平二人出境。其驅逐令有一「押送廣東交清官辦理」字樣。舟過新加坡時，幸該埠同盟會得訊，預延律師向新加坡當局依法抗爭，因得改爲自由出境，亦云險矣。光華報受此摧殘，同時復有封報捕人之謠諑，報中職員人人自危。銀安首避去檳榔嶼，餘人亦多隱匿別埠，因之不得已第二次停刊。銀安抵檳後，即與該埠同志陳新政等重組光華報，以繼承仰之統緒。然仰光華報僅停刊月餘，呂志伊、徐贊周、陳鍾靈、李海國、魏聲畝、陳震川、丘恩道諸人即已著手復興第三次之機關報。改光華曰進化，即以舊光華報資產充之。於庚戌春二月出版，陳鍾靈爲經理，呂志伊任筆政如故。進化報出版八月，康黨復賄買地方警察，藉假查賬爲名，向該報任意摧殘。終以公理不勝暴力，迫而停刊。志伊以是離緬歸國，事後徐贊周乃聯絡張永福、楊子貞、曾上苑諸人，以學務總會名義承買進化報機器鉛字。另創辦全緬公報，仍以倡導革命爲務。至民國成立，仍屹立弗衰。統計同盟會員前後在緬經營黨報多次，約耗六萬餘盾云。

八 加拿大之部

總理於戊戌年（民元前十三年）春自倫敦東歸時，嘗經由加拿大乘船至日本橫濱。當路過加屬雲哥華及維多利兩埠時，以行期匆匆，未暇向該處僑胞宣揚革命，殊屬憾事。明年己亥康有爲發起保皇會於雲維兩埠，而加拿大遂成爲該會之發源地。自己亥至己酉（民元前三年）之十年間，加拿大全土幾全屬康梁之勢力範圍。至己酉庚戌（民元前二年）間，加屬洪門人士漸受香港中國日報及舊金山大同日報文字之感化，遂有雲高華埠大漢日報之組織，延聘馮自由爲總編輯。由是革命思潮始澎湃於加屬，駸駸乎有萬馬奔騰之勢。辛亥正月總理更親蒞斯土募集軍資，各埠致公堂多變賣公產以應之。是歲三月二十九廣州黃花崗之役，加屬華僑籌餉所得竟佔全世界各地華僑捐款之第一位，是真可謂後來居上者矣。是地同盟會之組織亦在南洋各地及美國之後。茲分別述之如後：

（一）雲高華英日報

華英日報設於英屬加拿大之雲高華埠哈士定街一百號，爲耶穌教徒周天霖周耀初等所創辦。天霖係該埠有名之雜貨商，丙午年秋冬間與各教友組織此報，以宣傳耶穌教福音及開通民智

爲務，特函托廣州格致書院院長鍾榮光代聘主筆。鍾介紹崔通約應之。崔，粵之高明人，初爲康有爲弟子，後入耶教，曾佐鍾榮光任澳門格致書院教員。癸卯香港世界公益報出版，被派赴日本任通信記者，及就華英日報之聘。雲高華埠原有保皇會宣傳機關曰日新報，其主筆爲何卓競，以崔亦出身康門，彼此尙能相安無事。丁未某月華英報載粵吏通緝保皇會員新聞一則，保皇會以崔爲有意侮辱師門，竟在當地法院控告華英報毀謗名譽。崔乃向該埠洪門致公堂求助，且與香港中國日報通聲氣，乘勢提倡革命排滿之說，是爲加拿大報紙皈依革命之嚆矢。華英報與保皇報訟案牽纏一年有餘，以該報耶教股東財力薄弱，無以爲繼，不得已停刊。崔旋之美國舊金山，充任中西日報記者。

(二) 加拿大致公堂及大漢報

北美英屬加拿大全境有洪門致公堂數十處，與美國各埠致公堂南北互相對峙。其總堂設於卑詩省之首府維多利一小島，分堂林立於雲高華、新西院、天仁米、奶磨、雲利辟、沙士加寸、雷振打、都朗度、滿地可、魁碧各處。華僑掛名堂籍者殆佔全體人數十之八九。雲高華爲太平洋岸之交通孔道，工商業繁盛，來往華僑皆集中於是，因而此地致公堂之勢力亦較大於維多利總堂。洪門之宗旨原爲反清復明，以代遠年湮，會員多已忘却本來面目。自己亥（民國前十三年）春，康有爲自日本蒞加拿大，首設保皇會於維多利及雲高華二埠。致公堂會員誤入其

穀中者，頗不乏人。及甲辰年（民國前八年）舊金山洪門機關之大同日報改組，由馮自由代聘劉成禺爲主筆，日發揮洪門革命排滿之宗旨，美洲各地會員始漸覺悟。至己酉年（民國前三年）冬，雲埠致公堂大佬（卽主盟人之稱）陳文錫書記黃璧峯司庫岑發琛等感於革命潮流之澎湃，遂發起大漢日報爲洪門之喉舌。特移書香港馮自由請介紹主筆。馮於庚戌（民國前二年）正月得書，以其時廣州新軍反正一役敗挫未久，民黨元氣大傷，非闢新途徑不足以發展。遂辭退中國報社長及同盟分會二職，逕效毛遂之自荐。庚戌五月抵雲高華，時大漢報已出版半月，由張澤黎黃希純等擔任編輯事務。加拿大向無革命黨人足跡。致公堂以馮爲入關多年之洪門手足，（洪門稱加盟爲入關兄弟爲手足）頗能言聽計從，故馮主大漢報筆政數月，而全加會員之思想一新。莫不渴望祖國革命軍之速舉。各地保皇會員因而迷途知返登報脫黨者，絡繹不絕。雲埠保皇會原有機關報名日新報，開設多年，其主筆梁文興，康徒湯覺頓之小舅也。以彼黨勢力日漸衰退，遂向大漢報挑戰洩憤。馮乃揭發歷年康梁棍騙罪狀，向之迎頭痛擊。彼此駁論至二百餘續，爲海外兩黨最持久之文戰，而僑胞知識亦緣是具長足之開發。至是年冬，馮以籌餉大舉之時機已告成熟，乃電告總理，請其尅日來加發動募款。時總理正與黃克強趙聲等規畫廣州大舉，需款至急，得馮電大喜，遂由南洋兼程渡美。

辛亥正月初二晚 總理自美東轉向雲高華。洪門人士迎候於車站者千數百人，遂相偕赴致公堂茶會。總理與衆寒暄後，遍問座衆對革命有何疑義。會員起而質疑者數人，經總理解

答，衆咸心悅誠服。繼由致公堂假得華人大戲院，逐日由總理演講革命之是非得失利害種種問題。連續演講四日，每日聽衆逾千人，保皇黨徒及中立各派來聽者亦踵趾相接。馮自由知心可用，遂在致公堂提議設立洪門籌餉局，從事募捐，以應祖國大舉需要，衆無異議。於是推舉劉儒坤爲籌餉局總理，岑發琛爲司庫，陳棟如爲中文書記，黃希純爲英文幹事，黃紀傑爲交際幹事。規模既具，成效漸著。雲埠致公堂首捐香港幣一萬元，以爲衆倡。時革命軍統籌部設於香港，黃克強等屢來電催款。馮語總理，謂洪門會員多屬勞工，僅憑個人捐助，爲數無多。查各埠致公堂皆置有產業，若能使之變賣助餉，實爲事半功倍。總理深以爲然。願以事屬公產，外客不便進言，僅授意熱心青年從中倡議而已。維多利致公總堂向爲各埠領袖，其向背之態度，足爲各堂表率。某日設宴歡迎總理及馮自由等。席間有某散仔（洪門稱年長而資望深者曰叔父普通會員曰散仔）倡議，謂孫大哥（洪門稱屢次起兵抗滿之首領曰大哥）現接香港急電，廣東起義在即，急需軍餉。吾等有心協助，緩不濟急。本堂現有樓房可以抵押現款，似宜向銀行商借若干電匯應急等語。各叔父未置可否，次日召集大會研究辦法，總理與馮自由報告起義需餉情形後退席。於是各散仔紛紛提議將公堂樓宇抵押充餉之說。全場一致贊成，即遵總理指示將抵押所得之款港幣三萬元電匯香港文咸東街金利源藥材行，轉交李海雲收。金利源爲同志僑衆李煜堂兄弟之老店，海雲是其族姪，時任革命軍統籌部出納課長。

自維多利致公堂變產赴義後，當地僑商林禮斌、黃宣霖、朱文伯等亦自動匯港幣四千元。

他埠致公堂變產者，尙有郁朗度埠一萬元，滿地可埠四千元。此外捐款則多繳交雲埠籌餉局轉匯，約萬數千元。總數在港幣七萬元以上，佔辛亥三月二十九日黃花崗一役全球各地籌餉之第一位。總理於維靈二處捐款匯港後，即沿加拿大太平洋鐵路以達美東紐約。沿途經各大埠，輒下車向致公堂會員募款，所到輒受歡迎。成績之良，遠非美國致公堂所能企及，殊出總理意外。茲錄辛亥二月間黃克強、趙聲、胡漢民三人致余及域多利致公堂兩公函如左：（原函現由余保存）

（其一）黃興趙聲胡漢民致馮自由書

自由我兄大鑒：連讀手書兩通，敬悉，自前次收到域多利致公堂款三萬後，即具公函作覆，並請轉寄一函向域埠致謝，想俱收覽。昨午得來電，知溫哥華又匯到一萬元，以加拿大一屬而籌得如許鉅款，微兄贊助之力，必不及此，佩感何似。第二手書云兄尙可力任籌餉事，爲源源之接濟，真是餘勇可賈。即從大局論之，事若發起，幸而有成，內地固不乏資，而外力仍不能無賴，以軍用浩繁，無能預算。且購械購船等類有不可限於何方面者，歐美皆須有黨中可恃之人，則前途乃大得力，兄能力任於外，匪細事也。（日本於日俄戰爭時期，其派任專員於歐美者，其得力不止在外交上，彼爲成國且然，何況吾黨）。現在時期已迫，惟款尙不足，除英屬收到四萬餘元（日厘坤甸在內），西貢暹羅不過數千，加屬四萬，美屬僅收過金山五千，距預算總額尙差五萬元左右。（預算額中以購械爲最大宗，蓋新軍無

子，則必有爲之助者，此事兄可推測而知，而其謀已經告知中山，中山亦大以爲然，惟原擬購械之價，今以因於窘難。每個之價常逾於原擬，乃不得已之故。至當時所以預算至十四五萬，第一固由規模不得不大，第二則收入之預算，以爲英屬及西貢暹羅可得五萬（今所差無幾），美洲全境可得六七萬，荷屬可得六萬，（此爲謝良牧、姚雨平、劉子芬數人運動，當港軍事部成立時，據彼處資本家報謂八打威泗水等處已籌定此數，而豈知其後不然）。今美洲加屬亦已籌到四萬，金山雖則僅五千，然尙曰仍籌，則美洲或亦去原預算無幾。所難堪者，荷屬所匯到者今不及萬元，此數則以款絀要緩之電相報，於是荷屬之預算收入乃差五萬，於全局關係至大。中山東行，則紐約波士頓檀香山等處必仍有厚望。然能使時期展開，以待款來，則不可知。此次籌款以加屬所得爲最鉅，即兄之能力可知，若於加屬以外，更爲中山之助，使得速舉，亦所望也。專此卽頌近安。

興
弟 聲
頓首二月十二日

展堂

（其二）黃興、趙聲、胡漢民致域埠致公堂書

致公堂同志列位仁兄大鑒：前日收到尊處匯來軍事費三萬元，當即電覆由溫哥華轉達，

想已收悉。此間諸事俱已著實進行，規畫以兩粵爲主，而江湘鄂亦均爲布置。經濟問題自得尊處鉅款後，亦已解決過半，若美洲如舊金山大埠等皆能實力相助，則成功必矣。尊處同志關係先變產業以急應軍需，熱度之高，洵爲海外所未有，同人等不勝感服。內足以振作戰士之氣，而他埠同志聞風而起者，當亦踴躍倍於尋常矣，不審中山君此時尚在英屬否？各埠致公堂情義相通，尊處以大力爲倡，想必已有電函轉告，便皆傾力贊助。事機甚迫，於現時多得一分之經濟，不止有百十分之效力也。專此奉報，卽頌義安。

弟 趙聲 黃興

頓首 初六日

胡漢民

(三) 加拿大同盟會

加拿大向稱保皇會之發源地，康梁師徒頗有操縱僑衆之勢力。及戊申己酉（民國前三四年）間，徐勤因與同黨劉士驥爭奪廣西天平山礦產，遠派何其武刺殺劉於廣州，爲粵政府通緝，劉士驥一派大動公憤。雲高華保皇會會長葉恩兄弟爲天平山礦公司大股東，與劉交厚，因是憤然脫黨。加屬各埠從之者，大不乏人。是爲保皇會分裂之原因，亦爲革命黨勢力暴漲

之機會。在戊申己酉間，華僑有心革命者寥寥無幾，維多利埠嘗有少數有志青年組織一小團體，名擊楫社，以革命排滿爲宗旨。其會員祇有吳子垣、李翰屏、方幹謙、黃希純、吳俠一（一飛）、黃蔚生、司徒旄等七八人。創立未久，即以會員分散各地而解體，其後多加入同盟會。

庚戌夏馮自由抵雲高華，有志青年多以發起同盟分會爲請。馮以此來最大目的在於募集革命資金，致公堂爲當地革命黨之中樞，該堂會員素以老前輩自居，若一旦另立門戶，殊易惹起洪門人士之誤解，故不欲公開組織同盟會，致牽動未來籌餉之大計。因是到加半年，僅祕密收容有志青年黃希純、吳俠一、黃子錫、黃龍傑、黃蔚生、周連盛、黃傳杏、衛漢、甄一怒、司徒漢民、黃邑、何就、黃榮、黃元仕、湯崇富、伍時均、湯萬、湯崇德、湯添、黃茂、黃林、吳湘鴻等二十餘人。而在大漢報工作中直接間接最勇敢者，亦爲此二十餘人。

辛亥正月 總理來加發動籌餉，同盟會員假座周連盛所設紡織公司開歡迎會，會員及有志青年列席者三十餘人。及 總理離埠，洪門籌餉局將事結束，馮始着手同盟會之組織。在雲埠先後加盟者，有劉儒坤、葉求茂、楊芳、盤棠、陳榛如、司徒旄、李俊、謝恩、黃璧峯、司徒錫、周鶴年等百數十人。在維多利先後加盟者，有高榜（雲山）、朱禮（文伯）、方幹謙、曾暖、黃伯度、司徒衍衢、李翰屏等十餘人。是歲四月開成立會，衆舉馮自由爲支部長，周連盛爲副部長，黃希純爲中文書記，會所設於唐人埠以外之區域。蓋是時仍屬祕密的組織，不欲公

開活動，以免招致洪門會員中頑固派之反感也。

同盟會既成立，適雲埠中華會館每年改選董事期屆，向例由全埠僑衆用無記名投票法選董事二十人。華僑缺乏政治思想，對於會館董事，殊不重視。故歷年皆由保皇會員馬大諄等包辦。凡得三四票者即可獲得董事，且每次當選皆屬商家，而工界不與焉。自由認此次爲伸張黨勢之機會，乃授意會員以選舉運動之方法，令各向同性之團體或商店求助。華僑最重同姓感情，平時縱慣於拋棄選舉權，爲同族兄弟計，自然樂於成全。及選舉日，僑衆投票者較往年多出十倍。揭曉後，非得二十票以上不得入選，各舊董事咸咄咄稱異。結果當選者爲同盟會員劉儒坤、楊芳、周連盛、黃子錫、葉求茂、司徒錫等十二人。致公堂值理黃樹球、黃紀傑、許昌平、李起辰等四人。中立派周天霖等三人。保皇會員孫振邦一人。孫雖屬保皇會籍，以其與總理同邑同族，且於總理蒞此時，曾召集邑人設宴歡迎，故舉之。是時雲埠同盟會員尙不滿百人，竟能操縱萬數人之選舉權，誠爲海外各地華僑歷史之創例。

是歲五月，總理在舊金山同盟會員一律加入洪門會籍，與該地致公堂合組洪門籌餉局，以應國內革命軍需要。恐留美同盟會員仍與洪門人士有所隔閡，特電馮自由赴美相助。馮遂於七月下旬離加拿大，同盟會長一職，衆舉黃希純承乏。不及一月，武昌革命軍興，會務日益發展，華僑繼續入會者，有曾百泉、周子驥、曾兆、鍾暖、曾魁漢、馬少漢、鄺至、李天民、李佛池、侯民一、許一鶚、黃炳基、崔景、李血生、黃發文、黃熙賢、李鐵血、趙衛平、鍾健

鋒、鄺佐治、何夢齡、李慈五等數百人。各埠分會亦相繼成立，實則馮自由離加時，會員僅約二百人而已。

九 其他各部

除上述香港、檀香山、日本、美國、越南、暹羅、南洋英荷兩屬、緬甸、加拿大各部之外，尚有澳門、南非洲、台灣、菲律賓、澳洲、南美洲等處華僑亦與革命黨發生關係，於開國工作各有相當勞績，以範圍不廣，統名曰其他各部。茲分別述之：

(一) 澳門華僑之革命運動

澳門原屬我國廣東省香山縣濱海之一小漁村。明正德時（民國前四〇六年）葡萄牙商舶來此取給淡水，遂漸有彼國人足跡。嘉靖時（民國前三九〇年）又開港設官，年向我國納地租二萬兩。萬曆時（民國前三三九年）減為五百兩。我國向視其地為化外，一任葡人管理，不過問也。及清光緒十三年（民國前二十五年），駐北京葡使通牒清廷要求割讓。時任軍機大臣者為滿人倭文端，大言曰：澳門與新加坡相鄰，吾國要之無用，遂與葡使訂割讓條約五十四款及專約三條，承認葡國有管理澳門全權，而澳門遂不為我有矣。葡人既領有澳門，即特為遠東之主要財源，以擴張煙賭事業為謀利致富之政策。全市之大小煙館賭場，五光十色，觸目皆是。故居留其地之我國人，什九以煙賭為業。而從廣州香港往來澳門之賭客，以交通便利，朝發午至，

因而破家喪生者時有所聞。至葡人所施之政制，大都以保護及繁榮煙賭爲方針，故積弊重重，影響及於華僑知識，以視鄰境香港之崇尚法治，殆有天淵之別。

孫總理於壬辰年（民前二十年）在香港雅麗士醫學院畢業後，首在澳門康公廟前創設中西藥局懸壺濟世，以醫術高明，漸爲世人所歡迎。惟以澳地民智閉塞，開發困難，使其信仰西醫已屬不易，遑言國政。因詢知鏡湖醫院爲全澳有名紳商所公立，向用中醫中藥施治貧病。若從事政治運動，非先向該院紳商入手不可。遂由友人吳節薇介紹，迭請該院兼用西醫西學，以濟中醫所不及，並願擔任義務，不受診金。該院紳商感其高義，竟破例從之。總理由是與各紳商時相往還，友誼日篤。就中紳商之具有聲望勢力者，只何穗田、盧九、吳節薇、陳席儒、陳庚如、蕭瀛洲數人。盧蕭二人爲煙賭巨商，向以交結中外官宦爲光寵，最稱頑固。二陳爲檀香山大農學家陳芳之子，稍具洋化而乏遠見。穗田節薇思想較新，可作政治談友。穗田尤熱心愛國，惟不贊成激烈之主張。總理所認爲好友而時得其助力者，卽此何吳二氏耳。總理居澳數月，時欲物色熱心同志，如鄭士良、陳少白其人者，渺不可得。只有同邑人陸皓東、楊鶴齡、楊心如等數人往來石岐香港澳門間，相與暢談時政，餘人皆不敢引爲知己，因之遂有易地廣州另創門面之意。適是時當地葡醫因總理醫業興盛，大招所忌，遽提出禁止外籍醫生在澳門操業之議。總理早認澳門爲無可活動，遂乘機收束中西醫局，而移於廣州。卽第二次開設廣州洗基東西藥局是也。

乙未（民前十七年）重陽興中會在廣州失敗之後，總理與澳門舊友消息隔絕者多載。丙午丁酉（民前十五六年）間，康有爲師徒高談變法，梁啟海汪康年等發刊時務報於上海，風行一時。在粵康徒亦創設新報於澳門以應之。康弟廣仁（幼博）及諸弟子徐勤（君勉）麥孟華（孺博）劉楨麟（孝實）吳天民（介石）陳繼儼（儀侃）區渠甲（雲樵）韓文舉（樹園）何章（易一）梁鐵君諸人羣集其地，各爲危言異說以聳動觀聽，可稱一時之盛。而當時爲康門師徒之東道者，厥惟巨商何穗田，亦卽前數年總理在澳門業醫時最得力之好友也。時康徒陳子褒（康園子）張壽波等亦各倡辦學校，以謀獨佔該地之教育權，均大得穗田之助。及戊戌（民前十四年）清室政變，康有爲復發起保皇會於澳門，卽以穗田爲分會長，兼總會財政部長。同時在其地開設東文學校，聘日人田野橘次任校長。田野卽庚子（民前十二年）在上海出版之同文滬報社長，該報卽漢口自立軍首領唐才常之機關報也。穗田少入衛籍，與葡人多有瓜葛，康徒咸恃爲護符，是爲保皇會在澳門全盛時代。迨庚子七月唐才常自立軍在湘鄂以事洩失敗，唐部秦力山、朱菱溪、龔超諸人追究是役挫敗由於康梁中飽華僑捐款所致，羣向康梁算賬。康梁歸過於穗田，秦等先後至澳門查閱收支賬冊，結果乃知穗田僅爲一掛名之財政部長，事實上於總會財務，絲毫不能過問，特康梁之一工具而已。此案大白後，穗田始覺康黨棍騙之內幕，豁然大悟，漸與若輩疏遠。又是年上海電報局長經元善因領銜紳商千餘人致電清廷抗爭清帝廢立事，被通緝逃至澳門。葡督荷清廷請，囚之於大砲台，康徒乃求救於穗田，穗田以無力對。後由香

港與中會員謝讚秦代求香港總督卜力轉向葡督說項，經元善始獲出獄。穗田自是與保皇會脫離關係，而澳門遂漸不見有康徒足跡。

壬寅癸卯（民前九年十年）間，香山人鄭貫公、徐桂、劉思復等在縣城石岐發起書報社，以開通民智。尋擬設分社於澳門，以和者寥寥而止。及乙巳（民前七年）秋，東京同盟會成立，總理特派馮自由、李自重二人發展香港、澳門、廣州各地黨務，馮於丙午丁未（民前五六年）間，先後遣劉懋杭、阮亦周等至澳門荷蘭園和隆街二十一號設置機關，顏曰樂羣書室。劉思復曾假其地試驗炸藥炸彈。然成立數月，僅得基本會員數人，不得已宣布解散。丁未冬馮據香山盜林瓜四之弟瓜五報告，有澳門奸商柯某租用日輪，由日本私運軍械至澳門附近華界海面起陸圖劫，即派同志溫子純偕瓜五赴澳，預備劫奪該械後乘勢在香山錢山聚眾起事。其後查悉該械卸陸地點係在澳門，而非華界，恐因此惹起國際糾紛，遂爾中止。是即次年戊申（民前四年）正月中日發生大交涉之日輪二辰丸所運載武器也。嗣辛亥八月武昌革命軍起，粵中黨人亟謀響應。時鄰接澳門之錢山駐有新軍一團，早於庚戌（民前二年）正月倪映典反正之役與同盟會發生關係。至是遂有同盟會員劉思復、林君復、莫紀彭、鄭岸父諸人在澳門組織機關，專策動該軍反正。該軍官長何振、任鶴年、陳可鈺等毅然應之，為辛亥九月廣東獨立之一大聲援，世稱香軍者是也。要之澳門一地在中國革命史上，其地位遠不如香港之重要。良由該地華僑文化水準低下所致。查該地出版之日報，不獨在民國以前一無所有，即在民國建元迄今三十

餘年，亦只見有規模簡陋之小報二三種，以較香港大小刊物之日新月異，相去誠不可以道里計也。

(二) 南非洲與中會

楊衢雲於乙未重陽廣州一役失敗之後，即漫遊越南及南洋羣島印度南非洲各地。曾在南非洲之約翰尼士堡及波靈馬尼士堡兩埠設立興中分會，得同志黎民占、霍汝丁、王熾、王進、陳妹、何熾、馬子方、馬康、何益、江均、何禧、梁伯佳等數十人。經衢雲熱烈宣傳，會務頗形發達。丙申十月衢雲揚言將回國起義，衆多醜金助之。民占且賤售其商店事業從行。及至香港，衢雲以港地不能立足，遂之橫濱，以教授英文自贍。民占居港日久，旅囊告竭，竟鬱鬱以終。嗣後南非洲黨員皆寂然無聞，獨有約翰尼士堡埠黨員霍汝丁（字勝剛）於民初返國，曾投資於李其所創辦之江甯福羣實業公司，後數年復開設萃文書莊於香港荷理活道六十號，專經營書籍文具事業。該店至今猶存，南非洲與中會史事，獨此一人知之。

(三) 台灣與中會

興中會會員楊鶴齡有族弟名心如者，亦興中會員也。乙未九月廣州失敗後，即赴台灣台北謀生，充任台北永樂町美時洋行買辦。陳少白於丁酉年（民國前十五年）至台灣訪之，遂結識

僑商容祺年、吳文秀、趙滿潮等數人，共組織興中分會。惟因會員不多，未設會所，即以心家居宅充之。自後此地會員對於祖國無所表見，心如於民國後留滯台灣多年，從未返國，鄉人亦多莫知其消息。民三十四年我國克復台灣，從此華僑二字之名稱可廢除矣。

(四) 菲菲律賓同盟會及公理報

菲律賓僑興革命黨發生關係頗早，徒以美屬入境禁例森嚴，吾國人來往不易，因而革命黨不便派人前往發展黨務，延至辛亥年始有同盟會員之足跡。甲辰乙巳（民國前七八年）間，其首府馬尼刺僑商漸傾心革命，香港中國報及世界公益報在該處各銷售數十份。有閩籍西醫鄭漢淇者，香港雅麗士醫院畢業生，曾與總理同硯，素主張民族主義，為旅菲閩僑之巨擘。又有閩商楊匯溪之子豪侶，自幼生長廣東，曾留學日本早稻田大學，與馮自由交誼最密。二人均時向僑衆抨擊清政，不遺餘力，閩粵同胞多為感化。尤以歐陽鴻鈞、何寶衡、陳達三、林日安等數人為激烈。丙午年（民國前六年）保皇黨徐勤假座該處廣東會館演說立憲，欲乘機開設帝國憲政會。楊豪侶、歐陽鴻鈞、何寶珩等曾聚衆破壞其事，徐勤幾為毆傷，卒無所成。辛亥春陽江人李其奉派自香港至馬尼刺，訪鄭漢淇議開同盟分會。漢淇遂號召同志即日成立團體。受盟者有鄭漢淇、黃三記、王忠誠、黃漢傑、鄧寶廷、林日安、楊匯溪諸人。旋發刊公理日報，以漢淇為總理，是為旅菲華僑設報之嚆矢。

(五) 澳洲警東新報及民國報

澳洲全境以華僑入境禁例之拘束，向無革命黨人足跡。辛丑年（民國前十一年）梁啓超曾親遊其地，設立保皇會於雪梨金山及墨爾本、紐絲倫各埠。其時著名僑商殆無不列籍保皇會者。其言論機關曰東華新報，由梁啓超荐唐才常之弟才質主任筆政。丁未徐勤主使何其武暗殺同黨劉士驥事起，保皇會因是分裂。旅澳華僑漸知康梁斂財之真相，多登報脫黨，如上海永安百貨公司總理郭標即其一也。丙午年墨爾本華僑之有志者創設警東新報於羅索爾街一百八十九號，始提倡革命。庚戌年雪梨埠致公堂更有民國報之發刊，致公堂爲洪門三台會所組織，其宗旨曰反清復明，故民國報亦以民族主義相號召。其後民國三年由澳至美久任少年報記者之劉滌寰，民六年赴北京充任華僑參議員選舉代表之伍洪培，民十三年列席廣州國民黨改組大會代表之黃石公，皆出身於雪梨民國報者也。辛亥三月二十九廣州一役，雪梨及墨爾本兩埠同志捐資數百鎊助餉，均寄雲高華大漢報馮自由代收。此外紐絲倫或靈頓埠華僑呂傑、朱楷、黃國民等亦熱心革命，呂傑於戊申年曾致書香港馮自由求入革命黨，馮許其自行填寫盟書郵寄香港。同盟會定例，須主盟人或代理主盟人在場，始許加盟，呂傑郵遞盟書，實爲創舉。

(六) 庇魯國利馬埠民醒報

南美洲各國向無革命黨人足跡，諸國華僑人數，以僑寓庇魯、智利、馬埠者為最衆。庚戌辛亥間該處華僑青年李碩夫、許籟香數人集資創設民醒報，以開通民智宣導革命為宗旨。是為南美洲革命黨報之第一家。附近各國如智利、瓜地馬拉、哥士打力加、巴西、巴拿馬等處華僑均受其感化。辛亥八月革命以前，庇魯、智利二國捐餉匯寄香港中國日報代收者，為數不貲。因與祖國相隔太遠，故該處同盟會之成立係在民國以後。

十 華僑革命黨選舉歸國參政代表之經過

民元中華民國臨時政府宣佈成立之前，海外華僑革命黨特派歸國參與組織中央共和政府之代表二人，一爲南洋同盟會總代表吳世榮，一爲美洲致公堂同盟會洪門籌餉局三團體之總代表馮自由。均於辛亥十一月初旬返抵上海，同向代大元帥黃興及滬軍都督陳其美報到。是月六日孫總理由歐洲抵滬，馮吳二人往謁，卽由總理及黃興陳其美先後電告各省代表聯合會，以歸國之海外革命黨代表將參加組織臨時政府事。初十日各省代表在南京開臨時大總統正式選舉會。馮吳二人同往報到。代表會主席謂據臨時政府組織大綱，並無海外華僑參加選舉之規定，故歸國代表祇可就旁聽席等語。因此此二海外代表僅能觀光臨時大總統誕生之盛典而已。南北統一後，孫前大總統及南京留守黃興乃推馮自由爲臨時稽勛局局長。廣東臨時參議員盧信在參議院提議華僑應享有參政權案，國民黨各議員和之，結果議決參議院有華僑參議員名額六名，由海外各地中華總商會、中華會館、書報社之三種團體委派代表，在中央政府所在地選舉之。此項選舉法於元年八月公佈。未幾吳世榮組織華僑聯合會於上海泗涇路，衆舉世榮爲會長，吳應培副之。民二年春海外各埠華僑團體代表歸國參加北京參議員選舉會者一百八十餘人。衆發起全國華僑聯合會，假李鐵拐斜街肇慶會館開會，選舉馮自由爲會長。同時國民黨本部亦委托馮

自由以招待華僑同志任務。及選舉揭曉，當選參議員者爲唐瓊昌（美國大同日報社長）吳湘（南洋英屬僑商）朱兆莘（留美學生）謝良牧（檳榔嶼僑商）謝夢池之姪（蔣報和）荷屬泗水僑商（盧信）檀香山自由新報社長前臨時參議員）等六人。民五年冬國會恢復，參議院議員依法改選三分之一。民六年夏各地華僑團體代表歸國參加選舉者七百餘人，中以國民黨所屬書報社代表佔大多數，是爲全世界華僑代表有史以來之空前盛會。選舉第一日，當選者爲日本長崎中華總商會代表馮自由。時海外團體委托馮任代表者十三區，依法僅能代表一處，故馮祇擇長崎一地任之。第二日當選者爲美國舊金山國民書報社代表黃伯耀。事後均接總理自滬來電勉勵有加。選舉會開會後一月，參衆兩院以段祺瑞授意督軍團威脅，遽被非法解散，由是國會流離粵省者五載。至民十一年八月國會二度恢復，馮黃二人始北上就參議員職。明年十一月曹錕以重賄獲選總統，國民黨籍各議員已先期南下，宣言誓不參加賄選。自茲而後，所謂代表民意之參衆兩院遂萬劫不復矣。

921935



A541 212 0017 5143B

中華民國三十五年十月重慶初版
中華民國三十六年一月上海初版

華僑革命開國史一冊

（94216滬報紙）

定價國幣貳元伍角

印刷地點外另加運費

** 有 所 權 版 **
** 究 必 印 翻 **

著 者 馮 自 由

發 行 人 朱 經 農

上海河南中路

印 刷 所 商 務 印 書 廠

發 行 所 商 務 印 書 館

各地



931935